

1 SAMUEL

Samuelnin japari wishaa kirika

Diossen westíora bake Ana menia

1 ¹Efraín mananman iká, westíora jatín jane Ramá ikáinra iká iki, westíora joni Zufnin rarebo jaa, jawen jane Elcana. Jara iká iki Jerohamman bake, itan Eliúnin baba. Jawen papashokon papara iká iki Tohu, ja Zufnin bake, ja Efraínnin rarebo.

²Ja Elcanara iká iki rabé awinya, Penina betan Ana. Ja Peninara iká iki rabé bakeya, ikaxbi Anara iká iki jayaoma.

³Jatíbi baritiatiibira Elcana, jawen jemameax Silonko kaai pikókatitai, jainxon jatíbi atipana Ibo rabianan itan jawéki menixon menoxoni. Jainra sacerdote Elikan bake rabé iká iki, jaton janera Ofni betan Finees iká iki, jaboribira Ibon sacerdotebo iká iki.

⁴Jatian ja Elcananinra, ja jawéki Dios menixon menoxonaitiibi, Penina jatíbi jawen benbo bakeboyaxon itan jawen ainbo bakeboyaxonbi jawékianon ixon jato piti menikatitai,

⁵ikaxbi ja Anara bebonhira noia ixon jakon pitishamanbores menikatitai, Ibon bakeaisma imaa ikenbi.

⁶Jakopíra, Penina ja rawía ikax, jaki sinati shirokatitai, jawen shinan naman akananti kopí, Ibon bakeaisma imaa iketian.

⁷Jaskatira baritiatiíbi, ja Ibo rabiti xobonko Ana kaatian, Penina jaki sinákatitai; jaki jaskataitian winikinra Anan piamakatiai.

⁸Jaskákinra jawen bene Elcananin neskáakatiai: “Aná, ¿Jawekopíki mia winiai? ¿Jawekeskati onískinki min

piamai? ¿Eaki mina, ja chonka bakeyaati winobainbires jakonhirama iki?” akin.

⁹Ja Silonko inontianra, iitibi piá pekáo Ana wenita iki. Jatian ja sacerdote Elí iká iki, ja Ibo rabiti xobo xepoti ochóma jikitiainko, westíora ani yakatinin yakata.

¹⁰Jatian Ananra jakonmabires shinan kin itan winiananbi Ibo yokákin neskáa iki,

¹¹neskara axontira yoia iki: “Jatíbi atipana Ibó: Ea min yonoti ainbaon masá shinannai min oinna jakon iketian, itan ea shinanxon, westíora benbo bake min ea meniketianra, jatíbitian min tee anon ixon en mia meniti iki, jatian min tee ati en menia onanti inon ixonra, jawen boo en xatenantima iki”, akin.

¹²Jaskati Ana basiora Ibo bebonmeax yoyo ikaitianra, Elikan jawen kexain oinna iki;

¹³ikaxbi ja ainbora shinan meranres yoyo ika iki. Jawe joibi ninkáyamakinbira; jawen kebí koshiares oinna iki. Jatianra Elikan paenaxa iitai ixon shinanna iki,

¹⁴jainxonra yoia iki: —¿Jawetio basiki mia paenai? ¡Moa pae xekin jenewe! —akin.

¹⁵Jatianra Anan yoia iki: —Jaskarama riki íbó, jawe paebira en xeaama iki, ea riki masá tenei oniskin, Ibo bebonxon jakon shinan bikasi.

¹⁶Eara jakonma ainbobira iki ixon shinanyamawe, eara nato netebo Dios yokati iki, ayorakin jaakinres shinanni, itan iorai onisai kopí —akin.

¹⁷Jatianra Elikan yoia iki: —Masá shi-nanyamai jakonbires katanwe. Abánon ja Israelbaon Diossen ja min yokata jawéki mia menikin —akin.

¹⁸Jaskáara ainbaon aká iki: —Ichabires irake —akin. Japekáora Ana ja joibatato-ninribi moa baneti kaa iki, jainoax moa pii kaa iki, itan jatianra moa jawetianbi jakiribi onis wetsayamaa iki.

¹⁹Ja wetsa nete xabataitian, yaméki-rishokora moa Ibo rabia pekáo, jawen xobonko Ramáin moa baneti bokana iki. Japekáora Elcana jawen awin betan yorana iki, jainxonra ja ainbaon yokata jawéki Ibon imaxona iki.

²⁰Jaskataxa Ana moa tooya baneta iki, jainoaxa moa bakenti nete senenketian, westíora benbo bake pikota iki, ja Ibo yokáyantana kopíra Samuel akin janea iki.

²¹Japekáora Elcana jatíbi jawen bake-boya, ja axonti yoiabo senenhati kopí, yoina menixon baritiatíbi menoxonti iketian Silonko kaa iki;

²²ikaxbí já kayamakinra, Anan jawen bene neskáa iki: —Eara kayamapariái nato baken xoma akin jeneai kaman. Jatianra enbi Ibo boxon meniti iki, jatíbitian jain inon ixon —akin aká iki.

²³Jatianra jawen bene Elcananin neskáa iki: —Min oinna, jakon iketian jaskara awé. Iwé baneti ja baken xoma jeneai kaman. Abánon Ibon ja mia akinonxon yoia keská senenhakin —akin. Jaskataxa ja ainbo baneta iki, jainxonra ja baken xoma akin jeneai kaman aniaa iki.

²⁴Jatian moa xoma akin jeneketianra, ja bake maxkopari ikenbi, Ibon xobonko Silonko boá iki. Jainxonribira, boá iki kimisha waka bene, rabé chonka rabé litro trigo jainoax westíora bichi chomo uva xeati.

²⁵Jatianra westíora waka bake bene menokana iki, jainxonra Elí ja benbo bake moa boxonkana iki.

²⁶Jatianra Anan yoia iki: —Ea jawe jakonmabi shinanxonyamawe, mia jaara

kikin ikon iki, jaskara ikonribira en yoiai, ea riki ja ainbo neno mipataxon Ibo orani iantana.

²⁷Nato bake ea meninon ixonra en Ibo yokata iki, jatianra ea jan menia iki.

²⁸Enra Ibo moa já menia iki, jatian jaai kamanra jaki menikaata iti iki —akin. Jatianra Elí mainbi bekepinon kaman, Ibo bebon beota iki.

Ana bewaa

2¹ Jatianra Anan neskáakin orana iki: “Ibó, nokon jointianixbira ea miki raroai,

jaskákinra bená koshibo min ea meniboresai.

Jaskaakin min akinara nokon rawiboki

jakonmai yoyo iti en atipanke, ¡Eara raro iki!

² ¡Tsoabira mia keska jakon yamake, Ibó!

¡Tsoabira min akai keskáakin panamis yamake!

¡Mia Dios iketianra wetsa yamake!

³ Tsoabira rabíresi yoyo itima iki, tsoabira jatonbinix bebonbires rabítima iki,

Ibora jatíbi onan Ibo Dios iki,

janra jonin akábo toponnai itan ja akábo yoixonai.

⁴ Janra koshibaon kanótibo sekepa-keai,

itan yosmabora koshi meniai;

⁵ ja moatian jaton jawékiati texeakatiaibora,

rama pan pakex kopíres teemakanai;

ikaxbi ja pitin ikátiaibora,

rama moa pitia ikanai.

Ja bakeayamakatiái ainbora,

kanchisi bakenke;

ikaxbi ja icha bakeya ikátiaitonra,

moa bakeati atipanyamake.

⁶ Noa mawatai itan noa jaaira Ibon imaa noa ikai iki;

mawá kininko raanxonra noa jainoa tsekaribiai.

⁷ Ibonra noa jawebioma imai,
itan icha jawékiaribi noa imai;
noa rabinmai, itan noa jakonhain
imai.

⁸ Main rakáketian weninai keskáa-
kinra, tson akinyamai joni
Diossen akinnai,
jatian ja jawebioma jonira, manish-
potatiainoabi pikoai,
joni koshibo betan yasánnoxon,
jaskáxonra jain kikinbores ikainko
imai,
ja Ibonra jan mai tewanabo aká ibo
iki,
ja axonra ja pekatén nato nete aká
iki.

⁹ Janra jawerano inonbi, akonkin já
chibanaibo koirannai,
ikaxbi ja jakonmabora, jakonmai-
nox mawákanai,
tsonbira jaton koshinbi jaskarabo
janresti atipanyamake.

¹⁰ Ibonra jawen rawibo jato keyoti iki,
jatoki sinatira naikannmeaxbi tirin
iti iki.

Ibonra jatíbi nato netenxon aka-
nabo jato yoixonti iki;
jawen katota apora koshi meniti iki,
itan bebonres koshira imati iki”,
akin.

¹¹ Japekáora Elcana moa jawen
xobonko karibaa iki, Ramáin,
ikaxbira ja bake Ibon tee akí
baneta iki, sacerdote Elikan ati
yoiaibo akí.

Elikan bakebaon jakonma aká

¹² Elikan bakebaonra jakonmai jaabo
ixon, Ibo jawemabiakin shinankana iki,

¹³ ja sacerdote ixon atira jonibo
betan ayamakana iki; jawetianki ja
Ibo yoina menoxonkin tson inonbires
beai, jatianra ja sacerdotebaon yonoti
tenedor tso maya jokatiai, ja nami yoá
akanainko,

¹⁴ joxonra ja ani yamikentianoa itan
ja wetsa kentianoa, jainoax maxko
kentianoa iamax jan piti noeati jatíbi

kentianoabo, ja tenedornin bikátiai, ja
biaibora sacerdotebaona iká iki. Jatíbi
ja Silonko nokotai israelitabora jato
jaskáakatikanai.

¹⁵ Jainxonribira, ja makan tsamanaton
axon xeni menokanamatianbi joxon, ja
sacerdotenin yonotinin, ja yoina menoi
joni yoikatitai: “Ea nami meniwe, en
sacerdote xoixonon; nami wá iketianra
mia bixontima iki, paxara keenai”, akin.

¹⁶ Jaskaábi ja boai jonin yoitiki:
Rekenparira xeni menoti iki, ja pekáo-
parira min keenshaman min biti iki,
akin. Jatianra ja yonotinin akátiai:
“¡Iamarake ramabira min ea meniti
jake! Min ea meniamaitianra, en mia
koshi meexon bichinai”, akin.

¹⁷ Jaskaákin ja Elikan bakerano-
baon, Ibo bebon ocha akára kikinbires
jakonma iká iki, ja Ibo menikanai jawé-
kibo jakonmareskanai ikax.

¹⁸ Jatian jaskákanai kamanra, bake-
ranon Samuelnin; lino chopá tari sawé-
yaxon Ibon tee axonkin chibanboresa
iki.

¹⁹ Jainxonra baritiatíbi jawen titan, ja
Dios rabiti xobonko jawéki menii kakín
jawen bene betanbi, baritia senenatíbi
ja axona westíora jan perakooti maxko
bokatiai.

²⁰ Jatianra Elikan, Elcana betan jawen
awinki jato jakonhakin shinanxonkin,
neskáa iki: “Nato ainbaon jawen bake
Ibo menia iketian, mia abánon jan
kopíakin, nato ainbo meranxon wetsa
bakebo mia menikin”, akin. Japekáora
jaton itinko moa baneti bokana iki,

²¹ jainxonra Ibon Ana jakonhaboresa,
moa tooribia iki. Jatianra Anan kimisha
benbo bakeaxon, rabé ainbo bakea iki,
ikaxbi jawen bake Samuelra Ibo bebon-
meax anikaresa iki.

²² Jatianra Elí moa yosiora iká iki,
ikaxbi janra jawen bakebaonki israel-
litabo jawekeskabo abea iki ixon, moa
jatíbi ninkata iká iki, jainoaxibira ja
Diossen xobo xepotian teetai ainbobo
betanribi oxakana iki.

²³ Jaskara ikenra jato neskáakin yoia iki: “Jatfbi jonibaonra maton jakonma akaibo ea yoikanai. ¿Jawekopíki mato jaskatai?”

²⁴ Mato riki nokon bakebo, en oinnara jaskara itima iki, jatfbi Ibon jonibaonra mato jaskara ikaibo jato yoikanai.

²⁵ Westfóra joni iti iki, wetsa joniki ramiti, jatianra tsonkaya akárin iki ixon Ibon jato akinti iki; ikaxbi jawetianki westfóra joni Iboki ramitai, ¿Jatianki tson ja joni akinti iki?” akin. Ikaxbi ja bakebaonra, jawen papan yoiabi ninká-xonyamakana iki, jaskara iketianra Ibon moa jaton jati bichinnoxon shinanna iká iki.

²⁶ Jaskákanai kamanra, ja bakeranon Samuel anikaresa iki, jatian Diossen itan jonibaon jawen iká oinnara, jakonhira iká iki.

²⁷ Jaskara inontianribira westfóra profeta, Elíba nokota iki, jainxonra neskáa iki: “Ibonra moa onantishamanhakin neskáakin yoike: ‘Jatian maton rekenbo faraónman iboxon jato Egiptonko jakinna inontianra, en moa jato onantishamanhakin oinmaa iki.

²⁸ Jatíbi ja Israelbaon rarebo xarameara, nokon sacerdotebo inon ixon en jato katota iki, ea makan tsamanxonkanaton yoinabo keyokin menoxonaibo itiakin, itan incienso inintibo menoi itiakin jainoax eiba jayá kati tari saweti. Jainxonribira maton rekenbo, ea Ibo iketian israelitabaon jatíbi jawéki ea menikin menokanaitian en jato bomaresa iki.

²⁹ ¿Jaweatiki, ja meniti en yoia yoinabo itan jawékibo min yoyota iki? ¿Jaweatiki, ea ati bebonbires min bakebores kikinakin shinanon, nokon joni Israelbaon menia jawékibo, jatfbi jakonbo katóxon min bakebo min xoámaa?’ iki.

³⁰ Jaskara ikenra, ja Israelnin Ibo Diossen, mia itan ja min xobon iká-boyaxonbi jatíbitian tee axonti mia yoia ixonbi, rama onantiakin yoiai:

‘Jawekeskáxonbira en jato jaskara imayamai, ea kikinman shinanaibora, en jato kikin jakon imati iki, jan ea omissaibora, iresabires en jato imati iki. Ea, Ibo Dios ixonra, en ikon yoike.

³¹ Jatian ja min koshi, itan min rekenbaon koshi en keyoti netera moa ochóma iki, jatianra tsoa min rarebobi yosinon kaman jatima iki.

³² Israelhain jatfbi jakon jawéki en akaitianra masá teneananbi itan notsiannanbi min ointi iki, jatianra tsoa min rarebobi yosinon kaman jatima iki.

³³ Ikaxbi jaweti maton rareboresa, jainxon yoina menoti nokon makan tsamá ochóma en jato imati iki, abánon oinnax notsiaitian jato beron chexakin itan ibakanon jaton kayanko chexakaati, jainoax wetsa min chiní bakebora jatfbi jato retekanti iki.

³⁴ Ja min bake rabé Ofni betan Finees jaskara winotara, ja oinxon min onanti iti iki: já rabéra ja netebicho mawákanti iki.

³⁵ Japekáora jakon iketian itibi jaki koshiti sacerdote en imati iki, ea keena keská akaira iti iki, itan ja ati en yoia akaira iti iki, en meniara jatíbitian jawen chiní bakebo jati iki, ja en katota apo jatíbitian tee axonaira iti iki.

³⁶ Jatianra, jatfbi ja min rarebo mawatamabo, korfiki iamax pan pakex meninon ikax já bebon chirankooti bekanti iki, jawe tee ati inonbi non jawékiati binon sacerdotebo betan noa teemawe akin yokati’ ”, akin.

Ibon Samuel kenaa

3¹ Ja bakeranon Samuelninra, Elikan jaskara ati yoia Ibo Diossen tee axonboresa iki. Ja inontianra, Ibon tsoabi jawen joi jato yoiamai iká iki, oxakemabi namá keska meranxon jato yoyo akaira wetsatianbores iká iki.

² Ikaxbi wetsa netera Elí, moa benchei peokooxon jakonhakin ointi atipanyamaa ikax, jawen chitéain oxaa iká iki.

³ Samuelra Ibon xobonko, jain esé iká ani bonanti ikainko oxai rakata iká iki.

Jatianra ja Dios rabiti xobonkonía lám-para nokaamapari iká iki.

⁴Jatianra Ibon kenaa iki: —¡Samuel! —akin. Jatian jan aká iki: —¡Eara neno iki! —akin.

⁵Jatianbira Elí ikainko ishtoi kaxon yoia iki: —Eara moa joke; ¿Jawe atiki min mia keena? —akin. Jatianra Elikan aká iki: —Enra mia kenama iki, oxatanwe —akin. Jatian jaskaara moa Samuel oxaa iki.

⁶Ikaxbi Ibon kenaribia iki: —¡Samuel! —akin. Jatianra Samuel wenítaanan Elíiba kaxon neskáa iki: —Eara moa joke; ¿Jawe atiki min ea keena? —akin. —Enra mia kenama iki, baké oxatanwe —akinra Elikan aká iki.

⁷Samuelninra Ibo riki ixon onanama iká iki, moabi jaki pikóxon jan jaskáama iketian.

⁸Ikaxbi jawen kimisha itínra, Ibon Samuel kenaribia iki, jainoaxa wenítaanan Elíiba kaa iki: —Eara moa joke; ¿Jawe atiki min ea keena? —akin. Jatianra moa Elikan onanna iki, nato bakeranonra Ibon kenaa itiai ixon,

⁹jaskákinra neskáa iki: —Kaax oxatanwe; ikaxbi Ibon kenaara min neskáati iki: ‘Ea yoiwe, min yonotininra mia ninkatai’ —akin. Jatianra Samuel jawen rakátaiin kaax moa oxaa iki.

¹⁰Japekáora, Ibon joxon ja moa awana keskáribiakin kenaa iki: —¡Samuel! ¡Samuel! —akin. Jatianra Samuelnin aká iki: —Ea yoiwe, min yonotininra mia ninkatai —akin.

¹¹Jainxonra Ibon yoia iki: —Westíora jawékira en Israelhain akai, jatíbi jan ninkatabaonra akonbireskin jakonma shinanti iki.

¹²Ja netera iamama senenti iki, jatíbi ja Elikan bakebo yoikin en aká jawékibo.

¹³Enra moa yoia iki, min bakebora en jatíbitian masá tenemai kaai ixon, janra moa onanke ja jakonma akanabo; itan jawen bakebaon ea jakonmainbira jan jato notsinyama iki.

¹⁴Jaskara iketianra ja Elikan bakeboki ramíkin, akonkin senenhanox ea neskata iki, jawetianbira jaton jakonma aká jawékibo en keyotima iki, yoinabo menikin retexon, itan ja meniti jawékibo ea menikankenbi —akin.

¹⁵Jaskarabo iká pekáora moa Samuel oxaa iki, jatian moa nete xabaketianra ja Ibon xobo xepotibo moa kepena iki. Jatian ja namá keska meran iwana Elí yoitininra Samuel raketa iki,

¹⁶ikaxbira Elikan kenaxon neskáa iki: —¡Nokon bake Samuel! —akin. Jatian janra: —Eara neno iki —akin aká iki.

¹⁷Jainxonra Elikan yokata iki: —¿Jawekeskaki mia Ibon yoia? En mia yokatai riki, jawebi joneyamakin ea min yoitinin. ¡Ja mia Dossen yoia jatíbi jawéki, min ea yoiamaketianra, akonbireskin mia jan masá tenemati iki! —akin.

¹⁸Samuelninra jawebi joneyamakin, jatíbi ja ikabo onantiakin yoia iki, jatianra saí ianan Elí neskata iki: —¡Jara Ibo iki! ¡Jan oinna jakon iketian jaskara abanon! —iki.

¹⁹Samuelra ania iki, itan Ibonra akinna iki, jainoax ja axónnoxon yoia jawékibora westíorabi ayamai iamakin senenhaxona iki.

²⁰Jatian jatíbi Israelbaonra, Danhinxon peoxon Beersebain kamanxon, Samuelra ikon Ibon profeta iki ixon, onankana iká iki.

²¹Jainxonra Ibon jakiribi Silonko pikóxon onanmakin oinmaboresa iki, jainra iká iki jainxon Samuel jawen joi onanmaa;

4 ¹japekáora Samuelnin jatíbi Israelbo jato ninkámaa iki.

Fifisteobaon ja senenhabe konti joi jain iká ani bonanti bia

Jaskarabo inontianra, filisteobo Israelbo betan reteananox tsinkita iki, israelitabora filisteobo betan reteanani boax Eben-ezerhain ikana iki. Jatian filisteobobiribira Afec ikain tsamákana iká iki,

²Ja israelitabo akí bonoxa, filisteobo jain tsamakana iká iki, jatianra reteanankin filisteobaon israelitabo jatoaresa iki, chosko waranka jonira ja reteanankin jato retekana iki.

³Jatianra israelita sontárobo jato ikainko moa banéribikana iki, jainxonra Israel koshibaon jato neskáa iki: “¿Jawekopíki ja Ibon, filisteobaon noa ayonainbí jato amaresa? ¿Silonkononia, Ibon ja senenhabeonti joi jain iká ani bonanti binon bokanwe, jatianra noiba iti iki, jaskataxa non rawiboibakeax noa xabakaati iki!” akin.

⁴Jatianra israelitabaon westíora tsamá joni Silonko jato raana iki, jabaonra jainoa jatíbi atipana Ibon ja senenhabeonti joi jain iká ani bonanti moa bekana iki, jawen yakátira iká iki, ángel querubinbokibi aká. Ja Elikan bake rabé Ofni betan Fineesenra, Diossen ja senenhabeonti joi jain iká ani bonanti bokanaitian chibankana iki.

⁵Jainoax ja carpa peota ikainko, Ibon ja senenhabeonti joi jain iká ani bonanti nokotaitian, kikinni raro israelitabo mai shakónon kaman saí ikana iki.

⁶Jatian jaskati saa ikanai ninkataxa, filisteobo yokakanankana iki: “¿Jawekeskatikí hebreobaon carpa peotainko ichaira saa ikanai?” iki. Ikaxbi ja Ibon esé jain iká ani bonanti, moa carpa peotainko nokota onanaxa,

⁷raketi neskákana iki: “¿Diossa carpa peotainko nokóke! ¿Jawe ireskiaipanon noabo, rama kamánbira noa jaskaisma iki!

⁸¿Jawe ireskiaipanon noabo! ¿Tsonmein ikonbires koshi Diossen mekenmamea noa xabáati iki? ¿Janra egipcio jonibo tsoa jonibi jain jaama mananmanxon, jatíbi meskó masá teneti jakonmanin jato keyoa iki!

⁹¿Filisteo sontárobo, koshiakin shinantanan moa reteanantires ikanwe, itan koshi shinanyanixa mato reteananti iki, hebreo jonibaonra noa kikinakin

yanka yonokanake, jabo maton aní keskáakin!” iki ikana iki.

¹⁰Jatianra filisteobaon israelitabo moa reteanankin peoribia, itan jatoaresa moa, jaton carpa peotainko jabati bokana iki. Akonbireskinra jato retekana iki, jan reteananti jawéki boai sontarobora, kimisha chonka waranka joni retekana iki.

¹¹Jainxonribira ja Diossen esé jain iká ani bonanti jato bichinkana iki, itan ja Elikan bake rabé Ofni betan Fineesa retekana iki.

¹²Ikaxbi westíora sontáro Benjamínman rarebora, ja reteanantiainoax jabata iki, chopa waxabires itan mapo maibiresa ishtoi jabati kaax, ja netebi Silonko nokota iki.

¹³Jatian ja joni nokónontianra, Elí westíora ani yakatinin ja xepoti pataxbi bai naisi yakata iká iki, ja Diossen esé jain iká ani bonantiakinres shinani. Ja joninra jeman nokóxon ja bea joibo jato yoia iki; jatianbira jatikaxbi jainoa jonibo saí iki, peokokana iki.

¹⁴Jaskati saf ikanaitian ninkaxonra, Elikan jato yokata iki: —¿Jawe akíki, jatíbi jaskati saa ikanai? —akin. Jatianra ja joni, Elíiba ja joi keshani ishtoi kaa iki,

¹⁵jatianra Elí moa iskon chonka posaka baritiaya iká iki, jaskara ikaxa moa kikinni benchea iká iki.

¹⁶Janra yoia iki: —Reteanantiainoax jabatata ea ramashokobi nokóke —akin. Jatian Elikan yokata iki: —¿Jaweki mia winota nokon baké? —akin.

¹⁷Jatian ja joi beatonin yoia iki: —Israelbora moa filisteobo bebomeax jabákanke. Jainxonribira akonbireskin jonibo retekanke, jainribira min bake rabé Ofni betan Finees mawáke, itan ja Diossen esé jain iká ani bonantira filisteobaon mekenman banéke —akin.

¹⁸Jatian ja joi beatonin ja Diossen esé jain iká ani bonanti yoiketianra, Elí xepoti pataxbi jawen ani yakati manbires, pekatenbi paketa iki. Jatian

ja jonira moa yosi, itan iwe ikax, tetonko toekainax mawata iki. Jara iká iki chosko chonka baritia senen, Israelbaon koshi iká.

¹⁹Jawen baban ewa, ja Fineesen awinra jatian tooya iká iki, itan moa bakentiresibi, ja Diossen esé jain iká ani bonanti bichinkana onanax, itan jawen benen papa betan jawen benebi moa mawata ikenra, jabaonbi masá shinanni chexakaati moa bakena iki.

²⁰Jainxonra ja akini beabaon, mawákasaitian neskáakin yoikana iki: “Rakéyamawe, westíora min benbo bakera pikóke”, akin. Ikaxbi ja ainbaonra jawebi jato yoiamaa iki, jatora ninkáxonyamaa iki;

²¹ja bakera Icabod akin janekana iki: “Jaskatara ja Diossen esé jain iká ani bonanti bichinkana iketian, akana iká iki, Israelra moa jawen Diosyoma banéke”, akin.

²²Jara Diossen esé jain iká ani bonanti jato bichinkana kopí, itan jawen benen papa mawata iketian, jainoax jawen beneribi mawata iketian, yoiaho iká iki.

**Diossen esé jain iká ani bonanti
filisteobaon main iká**

5¹Ja Diossen esé jain iká ani bonanti bixonra, filisteobaon Eben-ezerhainxon, Asdodhain bokana iki;

²jainxonra, ja dios Dagón rabiti xobo meran jikimaxon ja pataxbi akana iki.

³Wetsa nete xabáketianra, Asdodhainoabaon nokóxon ja dios Dagón, ja Ibon esé jain iká ani bonanti bebonbi, mainbi rakata merakana iki. Jatianra ja dios Dagón weninxon jawen itinkobiribi akana iki.

⁴Ikaxbi wetsa nete xabáketianra, Asdodhainoabo nokóribikana iki, jainoax jakiribi jikixon, ja Ibon esé jain iká ani bonanti bebon, ja dios Dagón mainbi rakata meraribikana iki. Jawen mapo betan jawen rabé mekenbi iká iki sekékaina, ja jaton dios rabiti xobo

jikitiainko rakata. Jatian jawen yorabichores iká iki jatiobi.

⁵Jaskara kopíra ramakamanbi, dios Dagónman sacerdotebaon, Asdodhain iká jainxon jaton rabiti ani xobonko jikikin ja xepótiain makan joyota jamáyamakanai.

⁶Japekáora Ibon jato akonbireskin masá tenemaa iki, Asdodhainoabo betan ja mainmeabora jato nonbé isiman imaa iki, jaskatira ikonbires raké banékana iki.

⁷Jatian jaskarabo winotai oinnax, Asdodhainoano jonibo neskákana iki: “Israelbaon Diossen esé jain iká ani bonantira noiba itima iki, ja Diossenra akonbireskin noa masá tenemai, itan noa amaribikinbira non dios Dagónribi masá tenemai”, iki ikana iki.

⁸Jaskákinra jatíbi filisteo joni koshibo tsinkínon ixon, jato keshanti raankana iki, jainxonra yokákana iki: —¿Nonki Jaweatiki ja Israelbaon, Diossen esé jain iká, ani bonanti? —akin. Jatianra jabaon yoia iki: —Gat jemanko botankanwe —akin. Jatianra filisteobaon jain bokana iki.

⁹Ikaxbi jaskáakin moa bokankebira, Ibon jatíbi ja jemamea jonibo jato rakémaa iki, yosiboyabi, bakebo jato nonbé isiman imaa iki.

¹⁰Jatianra filisteobaon ja Diossen esé jain iká ani bonanti Ecrónhain bokana iki, ikaxbi ja jain nokóketianra, Ecrónhainoano jonibo koshin saí ikana iki: “¡Noa jatíbi mawánon ixonra, ja Israelbaon Diossen esé jain iká ani bonanti noa bexonkanke!” ikibo.

¹¹Jainoax jatíbiain ja jeman, Diossen jato akonbireskin masá tenemati jawéki raana ninkatax, ikonbiresi rakékana iki, jatianra jatíbi filisteo joni koshibo kenati jato raankana iki, ja bekanketianra jato neskáakin yoikana iki: “Nenoa, Israelbaon Diossen esé jain iká ani bonanti ja maton jainoano beainkoribi moa botankanwe. Noa jatikaxbi mawáyamanon ixon”, akin akana iki.

¹²Ja jemamea jonibora jaton diosbo yokati ikonbiresi saí ikana iki, ikaxbi ja mawatamabaon yorabora nonbébiresi ikana iki.

**Esé jain iká bonanti
filisteobaon banae**

6¹Filisteobaon mainra, Ibon esé jain iká ani bonanti kanchis oxe iká iki.

²Jainxonra filisteobaon ja sacerdotetebo betan shinanmanres onanmisbo, jato yokánoxon kenakana iki: —¿Jaweki ja Ibon esé jain iká ani bonanti betan non ati iki? Noa yoikanwe, jawekeskanonmein ja bekanainkoribi non boti iki ixon —akin.

³Jatian jabaon jato yoia iki: —Ja Israelbaon Diossen esé jain iká ani bonanti, ja bekanainkoribi banekinra, maton jawebioma raantima iki, ja jakonma aká kopíra, ja menitia maton Iboiba raanti iki. Jatianra moa mato benxoti iki, jainxonribira maton onanti iki, jawekopiki mato masá tenemakin jeneyamaa iki ixon —akin.

⁴Filisteobaonra yokata iki: —¿Jaweki non meniti iki, ja non jakonma aká kopí? —akin. Jatianra sacerdotebaon jato yoia iki: —Orora, nonbé jisáakin pichika maton ati iki. Filisteo joni koshibaona westíorabo; jainoax pichika xoya ororibi, ja mato jan akai kikin jakonma jawékininribi, ja maton koshibo masá tenemai iketian.

⁵Jaskara iken nonbé jisáakin, itan ja maton mai ramiakai xoya jisáakinboribi akanwe, jaskáaxon ja Israelbaon Dios rabikanwe, jatianra mato itan maton diosbo, jainoax maton maiboribi, moa masá tenematima iki.

⁶¿Jawekopíki ja faraón betan egipcio jonibo iní keskati, mato bebonhira yoitimati iki? Jabaonra Israelbaon Diossen jato masá tenemaaparises, israelitabo jato pikómaa iki.

⁷Westíora carreta benáshaman jato amaxonra, japekáo maton kaii wakanoniabi rabé waka awin maton biti iki,

jara iti jake jawetianbi jiwín manexanan jawe jawékíbi maton bomayosma, jara maton carretaki nexati iki; ikaxbira jawen bake benebaon chibanaketian, chité meran maton niati iki.

⁸Jainxonra Ibon esé jain iká bonanti bixon, carretanin maton naneti iki, jaskáxonra ja maton jakonma aká kopí, ja oro akana jawéki ja menitibiribi caja meran axon, ja bonanti pataxbi maton ati iki. Japekáoora carreta moa maton jabicho raanti iki.

⁹Ikaxbi matonra ointi iki: Ja nato carretaki wakan jawen maiori Bet-semes ikaori boai ixon, jaskáxonra non onanti atipanke non ani jakonma aká kopíra, ja Israelbaon Diossen noa rabinti imake ixon, ikaxbi ja carreta wetsaori kaketianra noa jan masá tenemama riki ixon, non onanti iki. Jatianra ikeanaxmabi, noa jakonma winota riki iki, noa iti iki —akin.

¹⁰Jatianra ja jonibaon jaskáa iki. Ja waka kaiakanainkonía rabé waka awin bixonra, ja bake benebo moa chité meran xepoa pekáo ja rabé wakaki carreta nexakana iki;

¹¹jaskáxonra Ibon esé jain iká ani bonanti bixon carretain nanekana iki, jainra oro xoya jisáakin akanabo betan nonbé jisáakin akanabo moa caja meran akana iká iki.

¹²Jainxonra ja wakabo Bet-semes bai kaatonin moa raankana iki, wetsaribo kayamaira pontéshamanres kaai maan iikaina iki. Jatian ja wakabo kaai chibani boaxa, filisteo joni koshibo Bet-semes mai senenainkores bokana iki.

¹³Ja Bet-semessainoa jonibora, mai teshanpain trigo tsekai iikana iki, jainxon oinnabainkin, ja jain Diossen esé iká ani bonanti merax ikonbiresi rarokana iki.

¹⁴Ja Bet-semessain iká, Josuénin wainko moa nokotax ja carreta tsasia iki. Jainra westíora ani makan iká iki. Jatian ja Bet-semessainoa jonibaonra, ja jiwí carreta moa karoakana iki,

jaskáxonra ja wakabo moa Ibo menixon, keyokin menokana iki.

¹⁵ Levitabaonra ja Diossen esé jain iká ani bonanti betanbi, ja oro jain akana caja jawékiya pakexon, ja ani makanmanbi tsamankana iki; jatian ja netera Bet-semes jonibaon Dios yoinabo menixon jatiobi keyokin menoxonkana iki, jainxon wetsa jawékiboribi menikana iki.

¹⁶ Jaskarabo oinna pekáora ja pichika filisteo joni koshibo moa Ecrónhain boí ja netebi banékana iki.

¹⁷ Ja pichika nonbé jisáakin oro axon, jaton jakonma aká kopí filisteobaon ja Ibo menikanara iká iki nato jemabaona; Asdodkana, Gazana, Ascalónmana, Gatna jainoax Ecrónmana;

¹⁸ jainoax ja oro xoya akanabora, ja pichika filisteobaon jemamea joni koshibotiibi akana iká iki, ja toponkana jemabora makan chitéyabo itan maxko jemabo chitéomaboribi iká iki. Jatian ja Ibon esé jain iká bonanti jan perakani ani makanra, Bet-semessain rama kamanbi Josuénin wainko japarike.

¹⁹ Ikaxbi Ibonra, ja esé jain iká ani bonanti chichó oinni kaketian, jaweti Bet-semessaino joni jato mawámaa iki. Kanchis chonka jonira mawata iki, jaskáakin ja jemamea jonibo Ibon jato ichaira mawámaa iketianra, ja jemamea jatíribi jonibo kikinbiresi winikana iki.

²⁰ Jatianra Bet-semessaino joni neskákana iki: “¿Tsoamein ja jakon Ibo Dios bebon jati iki? ¿Noa jenebaini kaxonmein, tsoa ati iki?” iki.

²¹ Jainxonra Quiriat-jearim joniboki neskara joi raankana iki: “Filisteobaonra, Diossen esé jain iká ani bonanti moa banekanke: jaskara iketian ja bii bekanwe”, iki iká.

7¹ Jatianra Quiriat-jearim jonibaon, ja Ibon esé jain iká ani bonanti moa bokana iki, boxonra westíora mató ikain, jain Abinadabnin xobo iketian ja meran niakana iki; japekáora jan bonanti koiranon ixon jawen bake Eleazar Dios iboamakana iki.

Samuel Israelbaon koshi iká

² Ja Quiriat-jearimhainra jain Ibon esé iká ani bonanti rabé chonka baritia iká iki, jainxonra Israel jonibaon jatíxonbi keenshamankin, Ibo benakana iki.

³ Jaskákanketianra jatíbi israelitabo, Samuelnin jato yoia iki: “Akonkin shinanax jatíbi maton shinanyanix Iboki banékinra, maton wetsankonia iresa diosbo jeneti iki, jainoax Astarté dios jisáakin akanaribi maton jeneti iki, Ibokibiribi maton jati jenetaanan, já akonkin rabiti kopí. Jatianra mato filisteobaon iboa iitainbi mato jan xabáati iki”, akin.

⁴ Israelitabaonra, Baal betan ja dios Astarté jisá akin akanabo moa potakana iki, jaskáxonra Ibobichores moa rabikana iki.

⁵ Japekáora Samuelnin jato neskáti yoia iki: “Jatíbi Israelbora Mizpánko tsinkíti iki, jainxonra mato kopi en Ibo yokáti iki” akin.

⁶ Jatianra israelitabo Mizpánko tsinkíkana iki, jainoara onpax bixon, Ibo menikin chikoxonkana iki. Ja netebora noara Iboki yoitimaax ochaa iki ixon, onanmeexon ayunankana iki. Jainoaxa, Samuel moa isralitabaon koshi jikia iki.

⁷ Jatianra moa filisteobaon onanna iki, israelitabora Mizpánko tsinkikana iki ixon, jainoaxa filisteo joni koshibo jato betan reteanani bokana iki. Israelitabaonra, moa onanxon jatoki rakékin,

⁸ Samuel neskákana iki: “Noa kopi, non Ibo Dios yokákin jeneyamawe, filisteobaon noa iboa iketian, noa xabáanon ixon”, akin.

⁹ Jatianra Samuelnin westíora carnero bene bake bixon, Ibo menikin jatiobi keyokin menoxona iki; japekáora Israelbo kopípari jato Ibo yokáxona iki, jatianra Ibon ninkáxon jen aka iki.

¹⁰ Jaskáakin Ibo menixon, ja akí Samuel iitaitianra, filisteobobiribi ja israelitabo akí bei, moa ochómaakana

iki; jatianra Ibon jatoki ani tirin ika pakéxon jato ratea iki, jaskákanketianra israelitabaon moa jatoaresa iki.

¹¹ Jatianbira israelitabo Mizpánkonix filisteobo chibani bokana iki, Bet-car tenaman kamanra jato reteboi nokókana iki.

¹² Japekáora Samuelnin westíora makan bixon, Mizpá betan Sen naxaran aká iki, jainra janea iki, Eben-ezer^a akin, ja iki: “Neno kamanra, noa Ibon akinke”, iki iká.

¹³ Filisteobora moa jatoareskana iká iki, jaskákinra israelitabo moa jakiribi jato mai bichinyamakana iki; ja Samuel japarinentianra, Ibo filisteoboki jakonma iká iki.

¹⁴ Ja israelitabaon jemabora, filisteobaon jato bichinna iká iki, Ecrónhainoax Gat kaman, jabora moa Israelbaon biríbakana iki. Jaskáxonra israelitabaon, jaton mai filisteobaon iboa fítainbi moa biríbakana iki, jainoaxa israelitabo, amorreobo betan moa jakon jakana iki.

¹⁵ Samuelra jaai kaman Israelbaon koshi iká iki,

¹⁶ jainoaxa baritiatíbi kakátiai, Betelhain, Gilgalhain itan Mizpánko, jatíbi ja jemankonia Israelbo jato akinti kopí.

¹⁷ Japekáora jain jawen jati iketian Ramáin jakiribi banékatitai, jainxonbira Israelbaon koshi ixon jato ikínkatitai. Jainribira jainxon Ibo yoina menixon menoxonti, westíora makan tsamá aká iká iki.

Israel apoya itin keena

8¹ Moa yosi ixonra Samuelnin, jawen bakebo Israelbaon koshi inon ixon jato janea iki.

² Jawen reken baken janera iká iki Joel, jatian ja rabé itin iká bake iká iki Abías, jabora Beersebain jaton koshi iká iki.

³ Jaskara ikenbira, ja bakebo jaton papa ikai keskati jakon iamakana iki,

jatobicho jayátinin kenaibores ikana iki, jato jaweayamanon ixon kopíakana biaibora ikana iki, itan ati keskabiakinra jato ayamakana iki.

⁴ Jaskara iketianra jatíbi Israel joni koshibo tsinkikana iki, jainoaxa Samuel betan yoyo iki, Ramáin bokana iki,

⁵ boxonra yoikana iki: “Moa mia yosi ikenbira, min bakebo mia keskati iamakanai, jaskara iketian noa jan ikinti westíora apo noa janexonwe, jatíbi wetsa mainmea jemabo jaskati axeax jakana keskáribiakin”, akin.

⁶ Westíora apo jan jato ikinti janexonti Samuel yoikanara, jawen keenma iketian Ibo yoia iki;

⁷ ikaxbira Ibon yoia iki: “Jawe jawéki inonbires, jonibaon mia yokáketian jato axonreswe, miama riki ja mion keenyamakanai, ea riki, ea jaton koshi ixon moa jato ikinyamanon ikax.

⁸ Ja en jato Egiptonkonkia pikonontianbira, ramakamanbi ebé jaskara ikanai, ja mia rama akanai keskáribiakinra, wetsa diosbo rabikin ea jeneyonkana iká iki.

⁹ Jaskara iken ja yokákana jato axonreswe, ikaxbi jato akonkin yoive ja apo jikixon jatíbi jaskara jato betan ati jawékibo”, akin aka iki.

¹⁰ Jatianra Samuelnin, ja yokákana jawéki Ibon yoia jato yoia iki.

¹¹ Jato yoia iki: —Neskáakinra ja maton apo ikaitonin, mato ikinti iki: Maton bakebo kenaxonra, jatíribi ja reteananti carron jato imati iki, wetsabora kabáyonin kaai jato imati iki, jatian wetsabora já koiranai itiakniribi jato imati iki.

¹² Jatíribibora waranka sontárobaon koshi iti, itan pichika chonka sontárobaon koshi itibo jato janenoxiki. Ja mato jatíribibora mai karanbeaibo iti iki, jainoax jatíribibora bimi tsekaibo iti iki, iamax jan reteananti jawéki akaibo, itan ja reteananti carro benxoati xao akaibobiribi iti iki.

^a7.12 Akinmis makan iki iká.

¹³ Jainxonribira maton bake ainbobo, jawen tee anon ixon mato bichinti iki, ininti akai ainbobo iti, yoa akai ainbobo iti, jainoax panhai ainbobo iti.

¹⁴ Jainxonra maton jakon maibo, jainoax ja uva waiyabi olivo wai jakon-hirabo mato iboakananxon, jabé teetaibo mato meninanti iki.

¹⁵ Ja maton bimi beroboyabi uvabora chonkankoniabo westíorabo mato bichinxon, jabé teetaiboyabi, jawen sontárobaon koshibo mato meninanti iki.

¹⁶ Jainxonribira maton yonoti benbo-boyabi ainbobo mato bichinti iki, jaská-ribiakindra maton jakonhira waka bene-boyabi burrobo bichinxon, jawen tee axonaiboribi imati iki.

¹⁷ Jaskáaribaxonbira maton yoina chité meranoa, chonkankoniabo westíorabo mato iboakananti iki, jainoax matobobira jawen yonotibo iti iki.

¹⁸ Ikaxbi jaweatibira non apo imakaskin katóyantana, iki mato ikainbira Ibon mato ninkáxontima iki —akin jato aká iki.

¹⁹ Samuelninra jonibaon ninkákanon ixon jato yoia iki, ikaxbira ninkáyamai neskákana iki: —Jara jawemabi iki. Noakayara apoya ikasai, ikires ikana iki,

²⁰ wetsa mainmea jonibo keskáribi, itan koshi jikitaanan noa jan ikinti kopí, jainoax noa reteanantiain ioti kopíribi —ikibores ikana iki.

²¹ Ja jonibo yoyo iketian ninkata pekáora, Samuelnin, ja joiboribi Ibo yoia iki,

²² jatianra Ibon neskáa iki: —Ja mia yokákanabo ninkáxon, jato westíora apo janexonreswe —akin. Jaskáxonra moa jainoax bekana jemabaon moa botankanon ixon, Samuelnin israelitabo jato yoia iki.

Saúl betan Samuel nokoanana

9¹ Ja Benjamínman rarebobires ikainoa westíora jonin janera iká iki Cis, jara iká iki Abielnin bake itan

Zerornin baba, jawen papashokon papara iká iki Affanin bake Becorat. Cisra iká iki kikinhakín jakonhakanai joni,

² westíora jawen benbo bakera iká iki Saúl janeya, ranon itan metsá. Já keska metsára wetsa israelitabo yamaa iki, itan jawen keyakanra jatíbi jato winoa iká iki.

³ Jatian wetsa netera, Cisnin yoina burro awinbo manota iki. Jaskáketianra jawen bake Saúl, Cisnin neskáa iki: —Benxokaatax westíora yonoti betan burro awinbo benai katanwe —akin.

⁴ Jatian kakinra Saúlnin Efraín manan shitabaina iki, jainxonra Salisa mairibi winobaina iki; ixonbira burro awinbo nokoyamaa iki. Jainxonribira Saalim mai betan Benjamín mai winobaina iki, ixonbira nokoyamaribia iki.

⁵ Moa Zuf, main nokoti kakinra, Saúlnin jabé kaa yonoti yoia iki: —Moa banénon awé, nokon papara ja burro awinboki akai bebonbires noaakinres shinani inake —akin.

⁶ Jatianra ja yonotinin yoia iki: —Nato jemanra, westíora profeta jake, jara jatíxonbi jakonhakanai iki, jatíbi jan jaskara iti yoiabora, winóyamai ikai. Jawe keská ixonra jan kati bai jan noa yoiti iki —akin.

⁷ Jatianra Saúlnin aká iki: —Jaskara iken kanonkawé. Ikaxbi, ¿Jaweki ja joni non boxonti iki? Non pishabaonra, moa jawe panbi yamake. Noara jawebioma iki ja profeta meniti —akin.

⁸ Jatianra ja yonotinin kopikin yoia iki: —Eara westíora plata koríki maxkoshokoya iki. Ja meninon kawé, ja profetanin jan kati bai noa yoiti kopí —akin aká iki.

⁹ Jatian (Moatianra israelitabo jawéki onanoxon Dios yokati boí ikátikanai neskati: “Ja oinxon onanmispari oinnon bakanwe”, iki. Ja rama “profeta”, akin akanaira, moatian akátikanai, “oinxon onanmis”, akin janekin).

¹⁰ Jatian moa jen axonra Saúlnin yoia iki: —Kawé jain kanón —akin. Jatianra

rabéxonbi, ja profeta jain iká jema pontebainkana iki,

¹¹ja ketó mapétian ja jema pontebainkinra, jaweti xontako onpax bii beaibo bechixon, jato yokákana iki: —¿Nenoki ja onanmis non nokoti atipana? —akin.

¹²Ja xontakobaonra yoia iki: —Neno riki, ikaxbira orichaa iki. Ishton kaxon ointankanwe, ramara nato jeman joke, ramara maxko xobonkoxon Dios yoina menoxonai.

¹³Jain nokóxon, ja Dios rabiti carpa xobonko pii kaamatianbi benakanwe. Já nokotamapari iketianra jonibaon piampari, janra ja menoti menikana yoinabo jakonhakin shinaxonti jake, ja aká pekáoparira ja chania beabaon pikanti iki. Jaskara iketian moa botankawe, ramabira maton nokoti iki —akin.

¹⁴Jabora ja jemanko kaai kakáreskana iki. Ja jemanko nokókanaitianbira, Samuelbiribi Dios rabiti carpa xoboori kaa iki.

¹⁵Saúl nokóti westíora nete maxkákétianra, Ibon Samuelki pikóxon yoia iki:

¹⁶“Bakish nato horaribira, Benjamínman mainmea westíora joni en miiba raanti iki, jara nokona inon ixon min ea imati iki, koshi jikitaanan nokon Israel jonibo jato ikinnon ixon. Janra ja filisteobaon iboa fítainbi jato xabáati iki, ea yokákankétianra nokon jonibo iketian en jato noibaa iki”, akin.

¹⁷Jatian Samuelnin, ja Saúl oinke-tianra Ibon yoia iki: “Já riki ja joni, já yoikin en mia ayantana. Natonra nokon jonibo koshi jikixon jato ikinti iki”, akin.

¹⁸Jatian moa jeman jikii kakinra, ochómakainxon Saúlnin, ja Samuel neskáa iki: —Minpari ea yoipannan, jaweranorin ja onanmiston xobo —akin.

¹⁹Jatianra Samuelnin aká iki: —Ea riki ja oinxon onanmis. Min rama ebé pinonpari Dios rabiti carpa xobonko mapéwe. Bakish yamékirishokora jatíbi

ja ea min yokatabo en mia yoiti iki, japekáora en mia raanti iki.

²⁰Ja burro awinbo min manómaara moa kimisha nete iki, ayorakin shinanyamawe moara nokokanke. Jainoax jatíbi ja Israel jonibo jan keenai jawékibora, mina itan jatíbi min rarebobaona iti iki —akin.

²¹Jatian Saúlnin yoia iki: —¡Ikaxbi ea riki ja Benjamínman rarebo joni, ja bebon ichama Israel jonibo! Jainoaxibi ja Benjamínman jonibo xaranra, ja ebé iká nokon rarebobo kikinmashokobobi iki. Jatian ¿Jaweatiki jatíbi jaskarabo min ea yoiai? —akin.

²²Jatianra Samuelnin, jawen yonoti betanbi Saúl bixon westíora chiteain jato boá iki, jaskáaxonra jain ikábo kimisha chonka joni xaranbi boxon, jakonshamain jato yakámaa iki.

²³Japekáora Samuelnin ja yoá akai joni yoia iki: —Ja en mia nami metex menikin, oke janbiribi awé akin aibata, bewé —akin.

²⁴Jatianbira ja yoá akai jonin, kishi jatiobi pikobeiraxon ja Saúl pinon ixon menia iki. Jainxonra Samuelnin yoia iki: —Ja riki minabiribi iti en mia benxoaxona. Bixon piwé, jara en miabiribi axona iki, nato jonibo betan senen min rama pinon ixon —akin. Jaskáxonra ja netebaon Saúlnin, Samuel betan piá iki.

²⁵Jatian Dios rabiti xobonkonix jemanko ipakexonra, xobo bochiki Saúl jain oxati benxoaxona iki,

²⁶jatianra Saúl jain oxaa iki. Jatian moa nete xabákétianra, Samuelnin ja xobo bochikia Saúl kenaxon yoia iki: —Wenitax mia kainko moa katanwe —akin. Jatianra Saúl wenita iki. Japekáora Saúl betanbi Samuel callen pikota iki,

²⁷jatian moa jemankonix ipakekinra, Samuelnin, Saúl yoia iki: —Ja min yonoti moa rekenkainon ixon ranwe, jainoax miapari shokores banéwe, ea Diossen yoibora en mia yoiti jake —akin.

**Samuelnin Israelbaon
apo iti Saúl imaa**

10¹Jatianra Samuelnin westfóra xeni pomo bia iki, jainxonra Saúlnin maponko chikokin bexéxon yoia iki: —Ramara Israel jonibaon koshi inon ixon Ibon, onantiakin mia imai. Miara jaton koshi ixon jaton rawi-boibakea min jato xabáati iki. Jatian natora iti iki, Ibon jawen jonibo ikinti mia koshi imaa jaskáaxon onanti:

²Rama eibakeax kakinra, Raquel miinmeta patax, Selsain Benjamínman mainmea min rabé joni nokoti iki. Jabaonra ja min benai iitai burro awinbo moa nokokana mia yoiti iki. Jainxon min papan moa jabo shinanyamakin, matores shinani, jawekeskáaxonmein en nokon bake nokotiki, iki janbix yokakaatairibira mato yoikanti iki.

³Ja mia orichashoko kaax Tabor jiwinko nokóketianra, kimisha jonin Betelhain Dios rabii kakin mia nokoti iki. Westfóratoninra kimisha cabra bake beneshoko boti iti iki, ja wetsanra kimisha pan boti iki, jainoax ja kimisha ikátonin boaira; westfóra bichi chomon uva xeati iti iki.

⁴Mia jowé ataanan jabaon rabé pan meniará, min jato bixonti iki.

⁵Japekáora mia Diossen jema Gabaain nokóti iki, jainra filisteo sontárobaon xobo iki. Ja jeman jikikinra westfóra tsamá profetabo, rama iti joi biaibo min jato nokoti iki, Dios rabiti xobonkoniax ipakekanaitian. Jato bebonra jonibo kati iki, panderobo, quenabo, arpabora aabainkanti iki.

⁶Jatianra Ibon shinan miki joxon mia iboati iki, jato ikai keskatiribira rama iti joi bii mia iti iki, jatianra wetsa jonibiribi mia iti iki.

⁷Moa jaskara jawékibo iketianra, mia Diossen akinna, mia keenai jawékibo moa min ati iki.

⁸Jaskara iketian Gilgalhain, miapari rekenkaintanwe, jainra ea miibetan

tsinkiti iki, yoinabora non Dios jatiobi keyokin menoxonti iki, jakopi jakonnax raeanantira yoia non meniti iki. Ea nokotai kaman kanchis nete jainxon ea manawe, jatianra jaskara min atibo en mia yoiti iki —akin.

⁹Jatianra Saúl, moa Samuelhibakeax kaai ishtona iki, ja Diossen jawen shinan moa wetsaresibi imaara; ja netebi jaskara iti yoia jawékibo moa jatíbi senenna iki.

¹⁰Jatianra Saúl jawen yonoti betan Gabaain nokóxon, westfóra tsamá profetabo rama iti joi biaibo jato nokoa iki. Jatianra ja Diossen shinan Saúl meran jikia iki, jaskáketianra ja wetsabo iká keskatiribi, rama iti joibo bii jato betan jain iká iki.

¹¹Ikaxbi jatíbi jabaon moabi onanabora, profetabo betan rama iti joi bikanai oinnax, yoianankana iki: “¿Cisnin bakeki jawe winota? ¿Saúlribiki profeta iki?” ikibo

¹²Jatianra westfóra jain ikátonin tekikin yoia iki: “¿Jatian tsoarin jaton papa?” akin. Jaskara yoiira ikanai: “¿Saúlki profetaribi iki?” iki.

¹³Rama iti joi bia pekáora, Saúl jawen xobonko kaa iki.

¹⁴Jainxonra jawen epán Saúl, jawen yonoti betanbi yokata iki: —¿Jaweranoki mato katana? —akin. Jatian Saúlnin yoia iki: —Burro awinbo benaira noa katanke, ikaxbi merayamaxa, noa Samuel oinni katanke —akin.

¹⁵Jatianra Saúlnin epán jato neskáa iki: —Eapari yoikanta, ¿Matoki Samuelnin jawekeska yoia? —akin.

¹⁶Jatianra Saúlnin jawen epa yoia iki: —Noara jan onantishamanhakin yoike, moa burro awinbo nokokana riki —akin. Ikaxbira Saúlnin, já apo iti Samuelnin yoia joi, jawen epa jawebi yoiamaa iki.

¹⁷Japekáora Samuelnin, Mizpánkoxon Ibo rabikanon ixon, israelitabo jato kenaa iki;

¹⁸Jainxonra jato yoia iki: —Israelbaon Ibo Diossa neskatai: ‘Mato israelitabora ja Egipto jonibaon iboa ikenbi jainoa en mato pikoa iki, itan jatfbiainoa koshi-baon mato masá tenemainkoniabo en mato xabáa iki’.

¹⁹Ikaxbi ramara, ja atikonmainoa itan masá tenetiainoa mato jan xabaa Dios, maton iresabires shinanai, jaskákinra jan mato ikinti apo yokáxon maton omisa iki. Jaskara iketian, ja jonibobires itan ja rarebobires mato Ibo bebon joti jake —akin.

²⁰Japekaobira Samuelnin, jatfbi Israel ja jonibobires bekanon ixon jato yoia iki, jainoa katotara Benjamínman joniboki suerte paketa iki.

²¹Jainxonra Benjamín jonibo ochóma joti jato yoia iki, jainoa suerte akanara Matrednin rareboki paketa iki, ja rareboainoa suerte akanara Cisin bake Saúlki paketa iki. Jatianra benakinbi nokoyamakana iki,

²²jatianra Ibo yokáribikana iki; Saúlki jain ikaxbi iká iki ixon onanti kopí. Jatian Ibon jato yoia iki, jainbira Saúl joneta ike, jawéki tsamata meran, akin.

²³Jatianra jonetainkonia pikoi boí ishtokana iki. Jatian jonibo bebon Saúl iketian oinkanara, tsoa israelitabi jawen keyá betan senenma ikax, jawen mapo pikotina iká iki.

²⁴Jainxonra Samuelnin jatfbi jato yokata iki: —¿Moaki ja apo iti Ibon katota maton oinna? ¡Westíora israelitabira já keska yamake! —akin. Jatianra, ¡Apo jabánon! akin israelitabaon aká iki.

²⁵Jatianbira Samuelnin ja apo ixon ati esébo jato yoia iki, jainxonra westíora kirikanin wishaxon, Ibo rabiti carpa xobonko benxa iki. Japekáora Samuelnin, moa jaton xobónko jatfbi botankanon ixon, jato yoia iki.

²⁶Saúlribira jawen xobónko moa Gabaain kaa iki, jatian Diossenbi keenmaara ja chibani, ichabires koshi shinanya jonibo jabé bokana iki.

²⁷Ikaxbira ja jakonmai yoyo ikaibo maxkáyamai, neskákana iki: “¿Nato-meinki noa jan xabaati?” ikibo. Ja iti jisáma iketianra, jaon keenyamakana iki; ikaxbi ja Saúlra onanaxbi onan-yamaa keská iká iki.

Saúl nin amonitabo jatoaresa

11 ¹Amónhainoa apo Nahasra, Galaadhain iká Jabessain kaa iki, jatianra ja jema betan reteanani kanoxon jawen sontárobo benxokaama iki. Ikaxbi ja Jabessainoa jonibaonra yoia iki: —Nobetan ja senenhabeconti joi awe, jatianra min yoia keská noa iti iki —akin.

²Jatianra ja amonita Nahasnin jato yoia iki: —Ja senenhabeconti joi en mato betan atira jakon iki, ikaxbi maton mekayaokea berobo en tsekanantinin kennira mato jeen iti iki, en jaskáara jatfbi israelitabo rabinkanti iki —akin.

³Jatianra Jabessainoa yosibaon yoia iki: —Kanchis netepari noa manawe, jatfbiain israelitabaon mainko joi botankanon ixonpari non jato raanbanon; jatian tsoabi noa akini joyamakietianra, noa miibetan iti iki —akin.

⁴Ja joi boai jonibora, Gabaain nokókana iki, jain Saúl jakátiainko, jatianra ja bokana joi jonibo yoikana iki. Jatikaxbira onisi ikonbiresi winikana iki.

⁵Jatianra Saúl nin wainkoni ax waka beneboya baneti joxon, jato yokata iki: —¿Jaweki jonibo winota? ¿Jawekopíki winikanai? —akin. Jatianra jonibaon Jabessainoara neskara joi bekanke ixon yoikana iki.

⁶Jaskara joi ninkákenbira, ja Saúl Diossen shinanman iboa iki; jainoaxa ikonbiresi Saúl sinata iki.

⁷Jatianra rabé waka bene bixon, Saúl nin xatepakea iki; jainxonra ja joi boai bo betan jatfbiain israelitabaon main ja waka pakexbo jato bomaa iki. Jatianra ja joi boai baon jato yoia iki: “Saúl betan Samuel chibankashamai

jabé rabéyamaibaon wakabora neskáshamanribiakanti iki”, akin. Jatianra jonibo ikonbiresi rakékana iki, jaskataxa biananax jainbicho tsamakana iki.

⁸Jatian jaskáakin Saúlnin jawen jonibo Beze ikain tsinkiara, kimisha pacha waranka Israel jonibo iká iki, jainoax Judáinoa jonibora kimisha chonka waranka tsinkita iki.

⁹Japekáora, ja joi botanabo nokóketian jato neskáakin yoia iki: —Jabessaino jonibo jato yoikanwe, bakish bariapanra non jato xabáin pikoai —akin. Jatianra ja joi boaibo boxon, Jabessaino jonibo jaskáakin yoikana ikonbiresi rarokana iki,

¹⁰jainxonra amonitabo yoikana iki: —Bakish netera noa miki menikaatai, min oinna jakon iketian jaskara min noa anon ikax —akin.

¹¹Ja nete xabáketianra, Saúlnin jawen sontárobo kimisha tsamá imaa iki, jainxonra nete xabatamatianbi, jaton rawibo tsamata napo jikixon, bariapanai kaman amonitabo jato retekana iki. Ja jiria banetabora jatfbiain janbiskana iki, ikaxbi tsoabira rabébo boyamakana iki.

¹²Japekáora ja jemamea jaweti jonixon Samuel neskáakana iki: —¿Tsoabaonki, ja Saúlra non apo itima iki ixon, ikonhayamaibo iki? Ja jonibora non retenon ixon, min noa meniti iki —akin.

¹³Ikaxbira, Saúlnin jato yoia iki: —Ibonbira rama Israelbo jato xabaake, jaskara ikaxa rama nete tsoabi mawátima iki —akin.

¹⁴Jatianra Samuelnin jatfbi jato yoia iki: —Gilgalhain bonon bokanwe, jainxonra ja apo ikátonin noa ikinkin onantiakin peoti iki —akin.

¹⁵Jaskáketianra, jatfbi jonibo Gilgalhain bokana iki, jainxonra Saúl Ibo bebonbi apo jikimakana iki. Japekáora Ibo betan raeannoxon yoinabo menikana iki, jainoax Saúl itan jatfbi israelitabora ikonbiresi rarokana iki.

Samuelnin jawen toan Saúl koshi imaa

12¹Japekáora jatfbi israelitabo bebonxon Samuelnin yoia iki: —Matonbira oinke jatfbi maton ea yokatabo en mato axona, jainxon westfiora apo en mato imaxona.

²Nato riki ja apo jan mato ikinti. Eara moa yosi iki, eara boxbires iki, nokon bakebora mato betan iki. Eara iká iki bake ranontianbi peoxon rama kamanbi jan mato ikinna,

³jaskara ikaxa ea neno iki: Jaton waka bene iamax jaton burro en bichina iketian, iamax yatanxon yonokin, masá tenemaxon en jato jakonmaa iken, itan jato jaweyamanon ixon ea kopiákana iketianbo, Ibo bebonxon itan janbi katota apo bebonxon en jakonma aká maton ea yoixonti iki, jatianra jatfbi ribinabo en kopiáti iki —akin.

⁴Jatianra jabaon aká iki: —Jawetianbira yatanxon yonokin min noa masá tenemama iki, jawe jakonmabira min noa akáma iki, jawetianbira noa jaweyamanon ixon non mia kopiama iki —akin.

⁵Jatianra Samuelnin jato yoiribia iki: —Ibo itan jan katota aponra onanke, ea jan yointi en jakonma aká maton nokoyamaa —akin. Jatian ikana iki: —Jaskara riki —iki.

⁶Jaskáaribaxonbira Samuelnin jato yoia iki: —Ibonbi amaara maton rekenbo Moisés betan Aarónman Egiptonkonia jato pikoai iká iki.

⁷Jaskara iketian benxokakanwe, Ibo bebonxonra mato betan en joi benxoati jake, mato betan itan maton rekenbo betan jatfbi jakon jawéki jan akábora en yoiti jake.

⁸Jatian Jacob jawen bakeboya, Egiptonko bokannontianra egipcioabaon, akonbireskin yonokin jato masá tenemakana iki, jainoaxa maton rekenbo Ibo akí noa akinwe iki ikana iki, jatianra Ibon, Moisés betan Aarón

Egiptonko raana iki, jabaonra maton rekenbo jainoa pikoxon, jato neno imaa iki.

⁹Ikaxbira israelitabo jaton Ibo Diossen shinanbenokana iki, jaskáketianra jan Hazorhainoa apo Jabínman, sontá-robaon koshi Sísarana iti jato menia iki, jainoax filisteobaona iti, itan Moabhainoa apona iti, ikaxbi jabora jato betan reteanana iki.

¹⁰Ikaxbira jaskata pekáopari, ja dios Baal betan dios Astarté jisáakin akanabo rabinoxon Ibo jeneax jaki ochaabo yoií noa ikona riki iki ikana iki, jaskáxonra jaton rawibaon iboa ikenbi jato xabáanon ixon yokákana iki, jaskáxonra ramara miabichores non rabiti iki, akin Ibo yoikana iki.

¹¹Jatianra, Ibon Jerobaal, Barac, Jefté jainoax ea Samuel, maton rawiboiba-kea xabáanon ixon, mato raanxona iki. Jaskatiresa mato jakon jake.

¹²Ikaxbi amonitabaon apo Nahas, mato keyoi joaitian oinxonra, jan mato ikinti westíora apo maton ea yokata iki, ja Ibo Dioskaya maton apo ikenbi.

¹³Ikaxbi neno riki ja maton apo iti katota. Ja riki maton yokáketian, Diossen mato menia.

¹⁴Ramara ja Ibo maton kikin shinanxon ja maton rabiti iki, jainxonra ja senenhati eséboki yoitimayamakin maton ninkáxonti iki, jaskatax jan mato ikinai apo betanbi, ja maton Ibo Dios keenai keskáres akí mato jati iki. Jaskataxesá mato jakonbires kati iki.

¹⁵Ikaxbi yoiti ixonyamakin, jawen esébo biamakin maton omisketianra, mato itan maton apo betanbi mato masá tenemati iki.

¹⁶Jaskara iketian ja mato ikainoax-bopari wetsanko boyamakanwe, Ibon ja ani rateti jawéki akaitian matonbi oinnon.

¹⁷Rama riki trigo tsekatitian ikax, oi beyamai, ¿Ikonmarin? Ikaxbi en Ibo yokáketianra, tirin imaananbi ea oi bemaxonti iki, jatianparira ninkáxon

maton onanti iki, ja Ibon oinna maton westíora apo yokáxon kikinbires jakonma jawéki aká —akin.

¹⁸Jaskátaanra Samuelnin Ibo yokata iki, jatianbira tirin imaananbi oi bemaá iki; jainoaxa jatíbi jonibo Iboki itan Samuelki ikonbiresi rakékana iki.

¹⁹Jaskákinra Samuel jatíxonbi neskáakana iki: —Nato min yonotibo kopí min Ibo noa yoixonwe, noa mawámayamanon ixon; nonbira ja westíora apo imakaskin yokáxon, non ochabo kaia-yona iki —akin.

²⁰Jatianra Samuelnin jato yoia iki: —Rakéyamakanwe. Ikon riki maton kikin jakonma aká; ikaxbi Iboiba-keaxkaya rama ochóyamakanwe, jaskáyamakinaya jatíbi maton shinanya-xonbi rabikanwe.

²¹Ja ikonma diosbo chibanyamakanwe, matora akinti atipanyamake, ikonma ixonra jakonmainoa mato tsekati atipanyamake.

²²Ikon jakon Ibo ixonra, mato potatima iki; mato jawen jonibo itinra já keenai.

²³Mato kopi yokákin jeneax ochanaketian ea Ibon koiranbanon. Jaskáyamakinra jakon itan Ibo keenai keskati jati en mato axeati iki.

²⁴Ibora maton yoiti ixonti iki, akonkin shinanxonra jatíbi maton jointiaxonbi maton rabiti iki, ichabires jan mato akinabora maton shinanti iki.

²⁵Ikaxbi jakonma akin maton jeneyamaitianra, maton apo betanbi mato keyoti iki —akin.

Filisteobo betan reteanankana

13¹Saúl, Israel apo ixon jato ikinin peonontianra moa anii senena iká iki; jainoax moa jaweti bari-tia apo ixonra,

²kimisha waranka israelita sontá-robo katota iki. Micmas ikain Betel mananmanra rabé waranka sontáro jabé baneta iki, jainoax wetsa waranka sontárorá Jonatán betan

Benjamínhainoa Gabaain baneta iki. Ja texea jonibora, moa jaton xobonko botankanon ixon, Saúlñin jato yoia iki.

³Jonatánmanra, Gabaain iká jaton xobonkonía filisteo sontárobo jato keyoa iki, jatian jara filisteobaon nikákana iki. Jatianra jaskara winota israelitabaon onankanon ixon, jatfbiainxon trompeta xoon akanon ixon Saúlñin jato yoia iki.

⁴Jatíbi israelitabaonra Saúlñin, filisteo sontárobo jaton itinkonia moa keyoa ninkakana iki, jakopíra filisteobaon, israelitabo omisa iki, jaskara ikenra israelita sontárobo Gilgalhain Saúl betan tsinkikana iki.

⁵Jatianribira filisteobo, israelitabo betan reteanani bonox tsinkikana iki. Irákana iki, kimisha chonka waranka reteananti carroya, sokota waranka kabáyonin ikái sontarobo, jainoax ja aniparo kexakea mashitii kikinshaman icha sontaroboya. Japekáora, Micmas ikain bokana iki, jainparira ikana iki, Bet-avénhainoax, bari pikotaiori.

⁶Israelitabora jakonmabires atikomanko ikax, filisteobaon jato aká kini meranbo, itan chawá xankenhaiño jonékana iki, shanka xaranbo, mai chaká meranbo, jainoax pozo jeneoma meranbora jonékana iki.

⁷Ichaxonra, Jordán shítax, Gad itan Galaad maiori bokana iki; ikaxbi Saúlra Gilgalhainbipari baneta iki, jatianra jatíbi jawen sontárobaon kikinbiresi rakeananbi chibankana iki.

⁸Jainxonra Saúlñin, kanchis nete senen, jan jatio basi manati yoia keskáakin Samuel manaa iki; ikaxbira Samuel Gilgalhain nokóyamaa iki, itan joniboribi moa boi peokoota iki.

⁹Jatianra Saúlñin jato yoia iki: —Jatiobi keyokin Ibo menoxonti yoinabo ea bexonkanwe, itan jabé raenoxon ja meniti yoinaboribi bekanwe —akin. Jatianra janbi menikin yoina keyokin menoa iki.

¹⁰Saúlñin ja yoina menikin senenhai betanribi Samuel nokóketianra Saúlñin ja bechii pikóxon jowé aka iki,

¹¹ikaxbira Samuelnin yoia iki: —¿Jaweati min ja jawékibo min akárin? —akin aká iki. Jatianra Saúlñin yoia iki: —Moa jonibo boí peokootaitian oinxon, en aká riki, itan ja min yoia nete moa mia nokóyamaketian, jainoax filisteoboribi Micmas ikain tsinkita iketian,

¹²ea Iboki menikaatamatianbira ipakebeiraxon Gilgalhainoa ea akanti en shinanna iki; jaskara ikenra enbi yoina jatiobi keyokin menoxonti iká iki —akin.

¹³Samuelninra yoia iki: —¡Ja min aká jawékira, min aresbiresa iki! Ja Ibon yoia keskáakin ninkáxon min aketianra, ja Israelhain jatfbitian akonkin apo mia jan imakeana iki.

¹⁴Ikaxbi ramara mia jatíbitian apo itima iki. Ibonra jawen keenshaman joni westíora benati iki, jaskáxonra jawen jemamea koshi iti janeti iki, minra jan ati yoiabo ninkáxonyamaa iki —akin.

¹⁵Jatianbira Samuel moa Gilgalhainoax kaai, tekikaina iki. Ja texea sontárobora reteanantian Saúl chibani bokana iki, ja Gilgalhainoax boaxa Benjamínhain iká jema Gabaain nokókana iki. Jainxon Saúlñin jabé boa sontárobo toponara, sokota pacha iká iki.

¹⁶Saúlra jawen bake Jonatán betan, jainoax jato betan boai sontároboya, Benjamínhain iká Gabaa jemanko banékana iki, jatianra filisteoboribi Micmasain ikana iki,

¹⁷kimisha tsamá reteananai filisteo sontárobo jaton ikainoax pikotaxbira; westíora tsamá Ofraori bokana iki, jara Sual main iká iki,

¹⁸wetsa tsamára Bet-horón jemaori kaa iki, jainoax ja kimisha itin iká tsamára, Zeboím teshanpa iká mananhon mai matoori tsoa jonibi jain jaama maiori bokana iki.

¹⁹Jatíbiain Israelbaon mainra, westíora jonibi yamin teetai yamaa iki,

jaskákinra filisteobaon shinanna iki, jaskara ixonra hebreo jonibaon espadabo, yami kenshobi jan chachimistibo akantima iki ixon.

²⁰ Jatíbi israelitabora filisteoboiba kati iká iki, jaton mai karanbetibo kenshoi, jaton lampabo kenshoi, jaton yamibo kenshoi, itan jaton picobo kenshoi.

²¹ Ja mai karanbeti betan lampa kenshotira icha kopíaxonbo ati iká iki, jainoax yamibo betan ja yami taxo kenshobo ramíketian benxoatira, icha kopíríbi ikaxbi namantanibo iká iki.

²² Ja reteanankanai netera, Saúl itan Jonatán betan boaiibo tsoabi espada betan lanzaoma iká iki. Saúl betan Jonatánbichora jayá iká iki.

²³ Jaskakanai kamanra, westíora tsamá filisteo sontárobo, Micmas ochómashoko nokókana iki.

Reteanankin jatoaresax Jonatán jakon ninkakaata

14¹ Wetsa netera Saúlnin bake Jonatánman, jan akinnai joni yoia iki: —Jowé, paro shitabainxon, filisteo sontáro keiba tsamatabo reteanankin jato anon kawé —akin. Ikaxbi Jonatánman ja reteanani kaai jawéki jawen papa yoiamaa iki,

² westíora mai mató pasenenain granado jiwi naman jainxon trigo xemekanainko tsamákana iká iki, jabetan iká sontarobora sokota pacha joni iká iki.

³ Janbiríbi iresama tari boti imakanara Ahías iká iki, Ahitobnin bake, Icabodnin noxa, ja Icabodra Fineesnín bake iká iki, Silonkonía sacerdote Elikan baba. Jonatán moa jainoax kaara jonibaon onanyamaa iki.

⁴ Ja kamanra, Jonatán filisteobo tsamatainko nokókasa iki. Jan katira rabé ani shanka oken ibékona naxaran kati iká iki, jawen janera Boses itan Sene iká iki,

⁵ westíorara norteorí Micmas bekeiba iká iki, jainoax wetsabiribira surkiri Gabaa jema bekeiba iká iki.

⁶ Jatianra Jonatánman jan akinnai joni yoia iki: —Kawé, keiba kanon, ja ikon Dios ikonhaismabo tsamákanainko kaman. Non Ibon noa jawe axontitian riki, icha joniaxon iamax ichama joniaxon non jatoaresnon ixon jan noa akintira jawena jawebi atikoma yamake —akin.

⁷ —Jatíbi ja min shinanabo areswe, enra ja min akasaibo mia akinti jawemabi iki —akinra ja akinaitonin aká iki.

⁸ Jatianra Jonatánman yoia iki: —Oinwe, abákanon noa merareskin, oa jonibo ikainko moa oke shitánon kawé.

⁹ Mato ikain noa ipakei kabánon jainxonbi noa manakanwe akin noa akanara, noa jainbi iti iki, jatianra jato ikain noa mapétima iki.

¹⁰ Ikaxbi mapéwe akin noa akanara, noa kati iki, jara iti iki jakopi non onanti, Ibon akinnara non akai jatoareskin, iki noa iti —akin.

¹¹ Jaskáxonra, ja filisteo tsamatabaon oinnon ixon ja rabékan jato meramaa iki. Jatianra jabo, jato oinnax neskákana iki: “Oinkanwe, ja kini meran joneta iká israelitabora moa jokonai”, iki.

¹² Jatianbira Jonatán betan jan akinnai joni akí, saí ikana iki: —¡Nato noa ikain mapékanwe, westíora jawéki non mato yoinon! —iki. Jatianra Jonatánman ja akinnai joni yoia iki: —Ea chibanwe, Ibonra israelitabaon mekenman moa jato imai —akin.

¹³ Jonatánra mapeti kaai tae betan mekenman wemeinata iki, ja akinnai jonira já pekáo kaa iki. Jonatánman filisteobo betan reteanankin jato maiki potaabora ja akinnai jonin namepakea iki.

¹⁴ Ja rekeni reteanankinra, Jonatán itan ja akinnai jonin ochókainamabi rabé chonka joni retea iki.

¹⁵ Jatíbi ja carpa peota meran ikábo itan ja jeman ikáborá ikonbiresi rakékana iki. Ja ichama tsamá sontárobo itan ja reteanani tsamáboribira

ikonbiresi rakékana iki. Jatianribira mai ninwana iki, jaskáketianra ikonbiresi anii ratékana iki.

¹⁶Ja Saúlnin, jan jato koiranti imaa sontárobaon, Benjamínhain iká Gabaa jemankoxon oinkanara filisteo jonibo jabati boí janbisbaini wetsaoribiresbo bokana iki.

¹⁷Jatianra jabé boai sontárobo Saúlnin yoia iki: —Nobé ikáboki tsoa maxkata non onannon jaton jane kenakanwe —akin. Ja jane kenakin oinkanara, Jonatán betan jan akinnai joni yama iká iki.

¹⁸Ja nete Ibon esé jain iká ani bonanti israelitaboiba iketianra, Saúlnin Ahías yoia iki: —Neri ja Diossen esé jain iká ani bonanti bewé —akin.

¹⁹Ikaxbi Saúl sacerdote betan yoyo ikai kamanra, ja carpa peotainko tsamata filisteobaon shinan onantimati bebonkaresa iki. Jatianra Saúlnin sacerdote yoia iki: —Moa Diossen esé jain iká ani bonanti neri beyamawe —akin.

²⁰Jatianbira Saúl itan jatíbi jawen sontárobo tsinkitax, moa reteanani bokana iki. Ikonbiresi jaton shinan onantimatax, filisteobo jatonbinix reteanani keyókana iki.

²¹Jainoaxa, moatianbi filisteobo betan iká israelitabo, jaton sontárobo reteanantian akini pikotaxbi, Saúl betan Jonatán akinnai israelitabo tsamataori winókana iki.

²²Jatian ja Efraín mananman joneti boyantana israelitabaonra, filisteobo jabati bokanaitian onanax, jato chibani boax jato betan reteanankana iki.

²³Jaskati reteananboi boaxa, Bet-avén kaman nokókana iki, jaskáxonra Ibon Israelbo jatian jato xabáa iki.

Akonkin senenhati ixon Saúlnin yoia joi

²⁴Jaskara ikaxa, ja nete jawebi piama ikax israelitabo ikonbiresi paxkinkana iki, Saúlninra akonkin senehanoxon neskara yoia iki: “Ja yametamatianbi,

itan ja nokon rawibo en jato kopitamatianbi piábora moa jakonma iti iki”, akin.

²⁵Jatianra sontárobo, jain mainbi mishkin tsamata nii ikainko nokókana iki.

²⁶Ja jonibo nii meran jikixon oinkanara onpax ikai keskati mishkin baita iki; ikaxbira tsonbi ja akonkin senenhati joiki rakékin tanayamakana iki.

²⁷Ikaxbi Jonatánmanra, jawen papan jaskara atima akonkin senenhakanti jawen sontárobo yoiatian ninkatama iká iki, jaskákinra jawen kekoti beai rebon, bonan naa chachia jain mishkín seróketian kokoax, jatianbi jawen shinan jakiribi koshiinakaina iki.

²⁸Jatianra westíora israelita sontaronin yoia iki: —Min papanra akonkin senehanoxon noa sontárobo yoia iki, jaweratobaonki wetsa jawékibires pai, jabora moa jakonma iti iki, ixon. Jaskara kopíra jonibo ikonbiresi paxkinabo iki —akin aká iki.

²⁹Jainxonra Jonatánman yoia iki: —Jaskáxonra nokon papan icha joni jato jakonma imake. Oinwe, eara nato ichamashoko mishkin tanax jatianbi koshiinakainke,

³⁰jainoax ja non rawibo piti bichinabo piaxkayara, noa bebon jakonhira ikeanke. ¡Jatianra ja filisteobo non jatoaresa, ani jawéki nona ikeanke! —akin aká iki.

³¹Ja netera, israelitabaon filisteobo reteanankin jatoareskana iki, Micmas ikainxon peoxonra, jato Ajalón kaman akana iki. Ikaxbi israelita sontarobora, moa ikonbiresi paxkinkanabo iká iki,

³²jaskákinra ja senentianbi jaton rawí bichina yoinabo, carnerobo, waka awinbo, waka bene bakebo, mainbi rakantaanan texteanan jatíbi jimabi pikana iki.

³³Ikaxbi jatíribibaonra, boxon Saúl yoikana iki: —Jonibora nami jimabi pii, Iboki ochai ikanai —akin. Jatianra Saúlnin yoia iki: —¡Matora

jakonhamisimabi jakonhamis keskábo iki! Westíora ani makan taranbekin, ea neno bexonkanwe.

³⁴ Jainoaxribi jonibo betan yoyo ikanwe, westíorabaon jaton waka bene iamaxon jaton carnero ea neno bexonkanon, maton textexon pinon, jatianra jimioa nami pii mato Iboki ochatima iki —akin. Ja yamébira westíorabaon, jatonbi jaton waka bene boxon, jainxon textekana iki.

³⁵ Saúlninra, janbiribi, Ibo Dios axonkin jainxon yoina menoti makan tsamana iki, japari menikin akára iká iki.

³⁶ Japekáora Saúlnin neskara ati shinanna iki: —Nato yamé filisteobo chibani tenaman bonon bokanwe, jato keyokin retexon, neteai kaman jatíbi jaton jawéki binon bokanwe —akin. Jatianra jatíxonbi yoikana iki: —Min oinna jakon iketian, jaskara awé —akin. Ikaxbira sacerdotenin yoia iki: —Jawe akamatianbira, Diospari non yokáti jake —akin.

³⁷ Jatianra Saúlnin Ibo yokata iki: —¿Enki filisteobo chibanti iki? ¿Israelitabaonki, jatoaresti iki? —akin. Ikaxbi ja netera Ibon jawebi jato yoiamaa iki.

³⁸ Jaskara iketianra Saúlnin yoia iki: —Jatíbi sontárobaon koshibo neri bekanwe, jainxon oinkanwe, tsonki rama nato ocha aká iki ixon.

³⁹ ¡Akonkin senenhanoxonra Israelbaon Ibon janenko en yoiai, nokon bake Jonatán inonbira, mawáti iki! —akin. Jatianra sontárobaon jawebi yoiamaa iki;

⁴⁰ jakopira Saúlnin jatíbi israelitabo jato yoia iki: —Mato neke tsamákanwe, jatian oke wetsa tsamaori nokon bake Jonatán betan ea ibanon —akin. Jatianra sontárobaon yoia iki: —Min oinna jakon iketian jaskara awé —akin.

⁴¹ Jatianra Saúl saí ika iki: —Israelbaon Ibo Diosé, ¿Jawekopíki rama ja min tee axonai joni jawebi min

yoiamaa? En jakonma aká iketian, iamax nokon bake Jonatánman jakonma aká ikaxa, suerte akana (Urim) makanshoko onanti pikóti iki. Ikaxbi ja min joni Israelbaon jakonma aká ikaxa, suerte akana (Tumin) makanshoko onanti pikóti iki —akin. Ja suerte akana Jonatán betan Saúlki paketa iki, jatianra ja jonibo jakonma akáma ikax moa xabakaakana.

⁴² Japekáora Saúlnin yoia iki: —Nokon bake Jonatánki, itan eki suerte akanwe —akin. Jatianra suerte akana Jonatánki paketa iki,

⁴³ jaskáketianra Saúlnin Jonatán yoia iki: —Ja min aká ea keshanwe —akin. Jatianra Jonatán keshaa iki: —Ikon riki, nokon kekoti rebonra bona mishkin tii axon, ichamashoko en tanaa iki. Ikaxbi eara neno iki, ea mawátira jawemabi iki —iki.

⁴⁴ Jatianra Saúl saí ika iki: —¡Jonatán, mia mawáyamakettian ea abanon Diossen akonbireskin masá tenemakin! —iki.

⁴⁵ Ikaxbira jonibaon Saúl yoia iki: —¡Jawekopíki Jonatán mawáti iki, jatoaresxon akonbireskin Israelbo akinnaxbi! ¡Jaskarara itima iki! ¡Ibo jakettianra, westíora boobi jawen maponkoniax pakétima iki! Ja rama akára, Diossen akinna aká iki —akin. Jaskáaxonra Jonatán mawáti ikenbi, jonibaon imayamaa iki.

⁴⁶ Jatianribira Saúlnin filisteobo moa jato chibankin jenea iki, jainoaxa jaton mainbiribi moa baneti bokana iki.

⁴⁷ Jaskataxa Saúl Israelhain moa apo jikia iki, jainoaxa jatíbi ja patax iká, jawen rawibo betan reteanana iki, jabora iká iki, Moab, Amón, Edom, Sobáino a apo jainoax filisteobo. Jatian ja ikanainkobo kaxonra, reteanankin jatoaresa iki.

⁴⁸ Jainoax sontárobo tsinkiax reteanankinra, Amalecbo jatoareskana iki, jaskáxonra Israelbo, ja jawéki yome-tsoamisbaon mekenmamea jato xabáakana iki.

⁴⁹Saúl¹nin benbo bakebora iká iki: Jonatán, Isúí, jainoax Malquisúta. Jatian jawen ainbo bake iká iki rabé: Merab, ja reken, jainoax Mical, ja jawen chiní.

⁵⁰Ja Saúl¹nin awinin janera Ahinoam iká iki, jara Ahimaasnin bake ainbo iká iki. Jawen sontárobaon koshin janera, Abner iká iki, jara Nernin benbo bake, itan Saúl¹nin epa iká iki.

⁵¹Cissa Saúl¹nin papa iká iki, jainoax Ner, iká iki, Abnernin papa, jabora Abiel¹nin bakebo iká iki.

⁵²Ja Saúl¹ janontianra, jatí¹bitian ikonbiresi filisteobo betan reteanankana iki, jaskákinra Saúl¹nin jatí¹bi jawen sontárobo koshi, itan rakéma jonibo jato benxokaamakatiái.

Saúl Diossen omisa

15¹Wetsa netera Samuel¹nin, Saúl¹ yoia iki: —Ibon raanara ea joke, jawen jema Israelhain mia apo imakin xenin machinon ixon. Jaskara ixon rama ja mia Diossen yoiai ninkáwe.

²Neskáraí ja jatí¹bi atipana Ibo: ‘Ja Egiptonkoníax pikotax Israelbo bekanaitian jato betan reteanankana iketianra, mii meranxon amalecitabo en jato masá tenemai.

³Jaskara iketian kaxon min sontároboyaxon jato reteanankin peoxon, jatí¹bi jaton jayata jawékiabi jato keyotankanwe, jawekeskaxonbira maton jato noibatima iki. Benbobo, ainbobo, bakebo, itan bená pikota bakebo, jainoaxibi waka benebo, carnerobo, camellobo, itan burrobo, maton keyokin reteti iki’ —akin.

⁴Jatianra Saúl¹nin, jonibo kenamaxon, Telaimhainxon jawen sontárobo jaton jane kenapakea iki. Rabé pacha waranka jonira ja reteanantiain main boaibo iká iki, jainoax chonka waranka jonira Judáinoabo iká iki.

⁵Japekáora Saúl¹ jawen sontároboya, Amalec jema ochóma kaa iki, westíora wean patax, jainxon jato akin peonoxa jain joneta iki,

⁶jatianra Saúl¹nin joi boaibo quenitaboiba raana jato yoia iki: —¡Oke, bokanwe! ¡Ja Amalecitaboibakeax pikókanwe, mato non jatoyabi keyoamabi; matonra ja non rekenbo Egiptonkoníax pikotax bekanaitian jakonhaa iki! —akin. Jatianra quenitabo, moa Amalecitaboibakeax pikókana iki.

⁷Jatianra Saúl¹nin jawen sontároboyaxon amalecitabo betan reteanankin Havilainxon peoxon, Shurhain kaa jiki¹tiain kaman jatoareskin jato chibankana iki, jara Egipto mai senenainko iká iki;

⁸jainxonra jaton apo Agag, yatankana iki, jaskáxonra jatí¹bi jawen sontárobo, reteanantiainxon jato retekana iki.

⁹Jaskara ikenbira Saúl¹nin, jawen sontároboyaxon Agag, jaweayamakin jamakana iki, jainxonra kikin jakonshaman carnero awinboribi reteyamakana iki, waka benebo, jainxon waka bene bake xoashamanbo, carnerobo, itan ja kopí jawékibo keyoyamaxonbira, jatí¹bi kopíma jawékibo betan ichama kopía jawékibores keyokana iki.

¹⁰Japekáora Ibon Samuel¹ yoyo aka iki:

¹¹—Saúl¹ apo imayamapainonbira en imaa riki, eibakeax ochótaan en ati yoia¹bo senenhayamaa iketian —akin. Jatianra Samuel¹nin jawen shinan kikin tsokas banéxon, Ibon ja Saúl¹ jaweayamanon ixon, ja yamé yokáxonshina iki.

¹²Ja moa nete xabataitianra, Saúl¹ bechinox kaa iki, ikaxbi Carmelhainra Saúl¹ kake akin yoikana iki, jain westíora monomto nichinxonra, westíoraakin mayataan moa Gilgalhori kaa iki.

¹³Jatianra Saúl¹nin, jaiba kaketian Samuel¹ yoia iki: —Mía Ibon jakonhabanon. Ea Ibon ati yoia, en moa senenhake —akin.

¹⁴Jatianra Samuel¹nin yoia iki: —¿Jatí¹bi yoinaboki min retea, jatian ja carnerobo itan waka benebo man ikai en ninkatai jawe iki? —akin.

¹⁵Jatianra Saúl¹nin yoia iki: —Jabora Amalec ikainoa kikin jakon carnerobo

betan kikin jakon waka benebo iki, min Ibo Dios meninoxon nokon sontárobaon bexonkana riki. Ikaxbi jatfíribi jawéki-bora moa non keyoa iki —akin.

¹⁶ Jatianra Samuelnin yoyo imayamakin neskaa iki: —¡Netewe, Ibon yamé ea yoiwana en mia yoibanon! —akin. Jatianra Saúlnin aká iki: —Yoireswe —akin.

¹⁷ Jainxonra Samuelnin yoia iki: —¿Apo ikámatianki eara kikinmashoko iki, ikax mia shinanmeeyamaa iki? Jaskara ikaxbira, mia israelita jonibaon rarebobaon koshi iká iki, jaskara ikenra já min yoiti ixonti iki.

¹⁸ Jakon riki, Ibonbira mia raana iki, ayamama ja ochaya amalecita jonibo jato reteanankinxon, jatfíbi jato jayata-yabi keyonon ixon,

¹⁹ ¿Jawekopíki ja ati yoiabo, min ninkáxonyamaa iki, itan ja maton rawibo bichinabo bixonki, jakonma jawéki min Ibo bebon ayamaa iki? —akin.

²⁰ Saúlninra yoia iki: —Enra moa Ibon jaskáti yoiabo ninkáxona iki, itan jan ati yoiabora en moa senenhaxona iki: enra Amalecibaon apo yatanxon, moa bea iki, itan wetsa amalecitabora en moa jato keyoa iki.

²¹ Ikaxbi ja sontárobaonra, ja kikin jawékibo keyoti ikenbi, jakon carne-robo itan jakon waka benebo bikana iki, Gilgalhainxon min Ibo Dios ja kikin shinanxon menixon menoxonti kopí —akin.

²² Jatianra Samuelnin yoia iki:

“Ja Ibon keen riki, jan yoia keskábo ninkáxonai iti, yoina keyokin menoxona itan yoina keyokin menoxonama bebonbiresiki yoiti ixona itan netékainxon ninkáxonai iti, ja jawékibo menixon menoxonai itan ja carnerobaon xenibo menititiani.

²³ Jakonmabires ocha riki ja jaki yoitimati,

ja onanmisai inox axei tanáti keskáribi;

jaskáribi riki ja rabiti aká rabiabo, itan Dioski yoitimati.

Jawen esébaon mia keenyamaa keskatira, rama jábiribi mia apo iti keenyamai”, akin.

²⁴ Jatianra Saúlnin, Samuel yoia iki: —Ikon riki eara ochaa iki, joniboki raketai kopí, jaton yoiabores axonai kopíra ja Ibon jaskara ati yoiabo itan ja min jaskara ati axeabaon ea shinanbenota iki.

²⁵ Ikaxbi en mia yokatai riki, nokon ocha min ea shinanxontima, ebé baneti kaxon Ibo rabii kawé —akin.

²⁶ Jatianra Samuelnin aká iki: —Eara kayamai mibé baneti, minra jaskara Ibon ati yoiabo senenhayamaa, jaskara ikaxa rama jaribi, moa mia Israelbaon apo itin keenyamai —akin.

²⁷ Samuel kaai ranbeakekainaitianra Saúlnin jawen perakooti kebí yatanxon noshinana iki.

²⁸ Jatianra Samuelnin, Saúl yoia iki: —Neskáribiakinra, mia Israelbaon koshi itimaakin Ibon mia ake. Jaskáaxonra westíora ja min kaibo, mia winoa bebon jakon iketian koshi imake.

²⁹ Ja Diossa Israelbo jan jatoareskinai iki, jara wetsa jonibires keskáma iki, jansotira atipanyamaa, jawen shinanra wetsaati atipanyamaa —akin.

³⁰ Jatianra Saúl iríbaa iki: —Eara ochaa iki, ikaxbira en mia yokatai, Israelbaon joni koshiabaon, itan jatfíbi jonibo bebon, apo keskáakin shinankin ea jeneyamawe. Jaskara iken ebé Gilgalhain kawé ja Ibo min Dios min rabinon —akin.

³¹ Jatianra Samuel, Saúl betan baneti kaxon Ibo rabia iki.

³² Japekáora Samuelnin ati yoia iki: —Ramara Amalecibaon apo Agag min ebebon beti iki —akin.

Jatianra jakonshaman shinanyanix Agag, Samuel bebon joá iki,

ja kikinbires jakonma mawáti onsára moa winóbirake iki ikax.

³³ Ikaxbi Samuelnin yoia iki: —Icha ainbobra sontárobo retenanxon, min bakeoma banémaa iki. Ramara jabo ikana keskáribi min tita banetai —akin.

Jainxon moa oribo yoiboyamakinra, Samuelnin Gilgalhainxon Ibon amaara retexon Agag xatepakea iki.

³⁴ Japekáora Samuel Ramáin jawen xobonko kaa iki, jatian Saúl biribira ja moa jakátiainko Gabaain jawen xobonko moa banetai kaa iki.

³⁵ Jainxonra Samuelnin, jawetianbi moa Saúl oinyosma iká iki, Saúl Ibon moa Israelbaon apo imayamaketianra masá shinanna iki.

Apo iti Ibon David katota

16 ¹Ibonra Samuel yoia iki: —¿Jawetio basikayaki min Saúl kopí masá shinankin jeneti iki? Eara moa já Israelbaon apo iikarestinin, keenyamai. Min jain xeni akai machaman xeni bochoawe, jaskátaanan mia Isaíkan xobonko, Belénhain mia katinra ea keenai jawen bakeboainoara, apo imanoxon en westíora katota iki —akin.

²Jatianra Samuelnin yoia iki: —¿Jawe akíki ea kati iki? ¿Apo iti wetsa en xeni machita onanxonra Saúlnin ea reteti iki! —akin. Jatianra Ibon yoia iki: —Westíora waka bake awin bibaini kaxon yoitanwe, Ibo, nato menixon menoxonira ea joke akin.

³Japekáora ja menotiainxon min Isaí kenati iki, jainxonra min jaskara atibo en mia yoiti iki. Jaweratoki ja apo imati en mia yoiai, jara min xeni machíti iki —akin.

⁴Ja Ibon jaskaati yoiara, Samuelnin aká iki. Jatian moa Belénhain nokóketianra, ja jemamea koshibaon

rakeananbi bii jokonxon yokákana iki: —¿Jakon joi beiki mia jóá? —akin.

⁵Jatianr Samuelnin yoia iki: —Jenjén jaskara riki. Eara joke nato waka awin bake Ibo menixon menoxoni. Dios bebon jakon inox chokikanwe, itan ja waka en menikin menoi ebé pii bekanwe —akin. Japekáora Samuelnin Isaí jawen bakeboyabi Ibo bebon jakon iti jato imaa iki, jaskámaxonra ja Dios jawéki meniainko kati jato kenaa iki.

⁶Jatian jabo nokóketianra Samuelnin, Isaíkan reken bake, Eliab oinxon shinanna iki: “Wetsama nato riki, ja Ibon apo iti katota joni”, iki ixon.

⁷Ikaxbira Ibon yoia iki: “Jawen jisá itan jawetio anirin ixon ja oinyamawe, jaskarabora nokon keenma iki. Jonin oinnai keskákin oinyamawe, jonira jaton yorabores oinnai iki, ikaxbi en oinnaira jaton shinanbiribi iki”, akin aká iki.

⁸Jatianra Isaínin jawen bake Abinadab kenaa iki, jaskáxonra Samuel bebon boá iki; ikaxbi Samuelnin neskáa iki: —Jama riki Ibon katota —akin.

⁹Japekáora Isaínin jawen bake Sama boá iki; ikaxbi Samuelnin yoia iki: —Natomaribi riki, ja katokota —akin.

¹⁰Jaskáabokinra Isaínin, jawen kanchis bakebo Samuel bebon boá iki, ikaxbira Samuelnin yoia iki, nenoa westíorabira jabo Ibon katotama iki akin.

¹¹Ja senenainbira yokáribia iki: —¿Min bakebokayaki moa yamaa? —akin. Jatianra Isaínin aká iki: —Ja benbo maxko, carnero koiranairesa maxkáke —akin. Jatian Samuelnin yoia iki: —Ja benatankanon jato ranwe, já nokotamabira non piti atipanyamake —akin.

¹²Jatianra Isaínin kenati jato raana iki. Ja betan ikástishamanra iká iki, ja baken yorara joxochashaman iká iki itan metsáshaman jonira iká iki. Jatianra Ibon Samuel yoia iki: —Nato riki já. Jaskara ixon, moa apo inon onantiakin xeni machiwe —akin.

¹³ Jatianbira Samuelnin pomon iká xeni bixon ja bake ranon David janeya, jawen wetsabo bebonbi moa onantiakin apo imakin xeni machita iki. Jatianbira Ibon shinanman moa já iboa iki. Moa piá pekáora Samuel jato kaai ataanan, Ramáin jawen xobonko kaa iki.

Davidkan Saúl tee axona

¹⁴ Saúlhibakeax Ibon shinan pikotax ochóketianra, jakonma shinan yoshin Ibon raana joxon Saúl masá tenemaa iki.

¹⁵ Jakopíra ja akinaibaon yoia iki: —Jawekeskaki min oinnai, ja Diossen amaa jakonma shinanman mia masá tenemaitian.

¹⁶ Jaskara iketian noa yoiwe, ja arpa ten ati onan benakanon ixon, jatianra mia jakonma shinanman akaitiibi, jan arpa ten akaitian min shinan jakonti iki —akin.

¹⁷ —Jakon riki, jakonshamanhakin arpa ati onan joni benakanwe, jaskáaxon ea bexonkanwe —akinra Saúlnin, jato yoia iki.

¹⁸ Jatianra jain iká westíoranin yoia iki: —Enra Isaíkan bake westíora Belénhain iká onanke, janra kikin jakonhakin arpa ten akai, itan jara reteanankas ikax rakéma joni iki, jainoax metsá itan jakoni yoyo iti onanribi; itan Ibon akinnairibi riki —akin.

¹⁹ Jatianra Saúlnin, joi boaibo Isaí yoiti jato raana iki: “Ja min bake David carnerobo koirannai ea raanxonwe”, akin yoiti.

²⁰ Jatianra Isaínin jawen bake David, Saúlhiba raankin: Westíora burro, jainxon panhaxonbo, jainoax westíora bichi chomo uva xeati bochóya itan westíora cabra bake bene jabé Saúl bomaa iki.

²¹ Jaskati Saúl bebon kaaxa, David ja akinnai baneta iki, Saúlninra onanxon ichabires jaki jakon shinanna iki. Jaskákinra wetsa jan akinnaibo bebonbires já akinnai itiakin Saúlnin janea iki.

²² Jainxonra Saúlnin westíora joi Isaíki raana iki, David jabé banénon ixon yokákin, jan oinna jawen keen iketian.

²³ Jaskákinra ja Diossen raana jakonma shinan yoshinman Saúl akaitian, oinxon Davidkan jawen arpa bixon ten axonkatitai. Jaskáaxonara Saúlnin koshi shinanhinabainxon, jakon shinan katitai, jatianribira jakonma shinan jaibakeax ochókatitai.

David Goliat reteax jawen main ninkakaata

17 ¹ Wetsa netera filisteo sontárobo israelitabo betan reteanannox, Judámain iká Socó jemanko tsinkíkana iki, jabora Socó jema betan Azecá jema naxaran Efes-damimhain ikana iki.

² Jatianribira Saúl itan jawen sontárobo, Elá mai teshanpain tsinkitax, jainoax filisteobo betan reteanannox benxokakana iki.

³ Wetsa mai mató maxkaten filisteobo iketianra, ja bekeiba wetsa mai matokan israelitabo ikana iki, ja naponra mai teshanpa iká iki.

⁴ Jatianbira filisteobo xarameax, kimisha metroya westíora reteanankas joni pikókawana iki, jawen jane Goliat, ja iká iki Gat jemamea.

⁵ Jawen maponko bronze maitia, jawen yoranko bronze xopanantia, bronze aká jawen iwe pichika chonka pichika kiloya.

⁶ Jan witax panati, itan tsatsitaxo iaxon boaira iká iki bronze akanaribi.

⁷ Jawen tsatsitaxo kikin ani, jawen rebonko kensho iká yami iká iki sokota kilo winoa. Jan Goliat akinnaira já bebon kaa iki.

⁸ Jatianra Goliat, israelita sontárobo bebon chankatax saí ika iki: —¿Jawekopí reteanani mato joarin? Ea riki filisteo, jatian mato riki ja Saúl akinnaibo, jaskara ixon mato xaranmea joni katokanwe ebé reteanani jonon.

⁹ Ebé reteanankin eaaresti ikaxa joti iki, jatianra noabo maton kikin hakin

yanka yonoaibo iti iki; ikaxbi já enha-resketianra mato non kikinahakin yanka yonoaibo iti iki.

¹⁰Rama netera en mato yoiai, Israel sontárobo betan reteanankaskin. ¡Ea westíora joni raanxonkanwe ea jabé reteanannon! —akin.

¹¹Jaskati filisteo joni yoyo ikai ninkataxa, Saúl itan jatíbi jawen sontárobo jaton shinan yosmabainax ikonbiresi rakékana iki.

¹²Matonra moa onanke westíora jonira Belénhain jaa iki, jawen jane Isaí, jara Saúl apo inontian moa bebon yosiora iká iki. Jara posaka benbo bakeya iká iki, westíora jawen baken janera David iká iki.

¹³Jatian ja Isaínin kimisha reken bakera, ja Saúl reteanani kaaitian chibani bokana iká iki. Ja kimisha bake reteanani kaabaon janera iká iki: Ja reken Eliab, ja rabé itin iká Abinadab, itan kimisha itin iká Sama;

¹⁴jainoax David iká iki ja senenainoa bake,

¹⁵jara Saúlbiribi akinnai ikáx, ja ikana chopaxobonko kaax, itan Belénhain jawen papan carnerobo koirani kaax ikai iká iki.

¹⁶Jaskákanai kamanra Goliat filisteo joni, yamékiritiibi itan yantántiibi israelitabo sinái pikota iki, chosko chonka nete senenra jato jaskáa iki.

¹⁷Wetsa netera Isaínin jawen bake David, yoia iki: —Nato trigo tobán rabé chonka litro biwé, jainxon chonka pan, jaskáaxon min wetsabo ishton jato ikana chopaxobonko boxontanwe.

¹⁸Ja sontárobaon koshiribira, min chonka queso boxonti iki. Jainxonra min wetsabo min ointi iki, jawekeskaki ikanai ixon, jakon ikanaitianra ja oinxon en onanti wetsa jawékibires min ea bexonti iki —akin.

¹⁹Jaskatai kamanra, Saúl itan Davidkan wetsabo, itan wetsa israelita sontárobo, Elá mai teshanpainoax filisteobo betan reteanani ikana iki.

²⁰Ja nete xabataitianra, David carnerobo wetsa joni koiramataan; jawen papan menia jawékiati jawéki jato boxoni kaa iki. Jatian ja ikana peotainko David nokóketianra, sontárobo moa reteanani boí jokonkana iki, ja boira reteanantikiri iki saí ibainkana iki.

²¹Israelitabo betan filisteobora, reteanox beibanani joyókana iki.

²²Ja reteananti jawéki betan ja jawékiati jawéki koirannai joniki, ja boai jawékiatibo jenebaini ishtoi kaaxa, David jatoiba nokota iki; matoki jawekeska iki akinra jawen wetsabo yokata iki.

²³Jaskati jato betan yoyo ikaitianra, ja reteanankas filisteo joni, Gat jemamea jawen jane Goliat, ja filisteobo tsamatainoax pikókirana iki, jainxonra jato abea keskábiakin sináatoshia iki. Jatianra Davidkan ninkata iki.

²⁴Ja joni jaskataitian oinnaxa, israelitabo ikonbiresi raketi já bebonmeaxbi jabákana iki,

²⁵jaskatira neskákana iki: “¿Oa joni pikotaki, moa maton oinna? ¡Jara Israelboki sinati joá iki! Tsonki já ayonnai jara apon icha kopí jawéki meniti iki, itan jawen bake ainboribi awinhanon ixon meniti iki, jainxonribira jawen rarebobaon moa apo jawebi kopíatima iki”, ikibo.

²⁶Jatianra ja patax ikábo Davidkan yokata iki: —¿Ja nato Goliat reteketianmein itan jan Israelbo ramiasesaibo keyóketianmein jawe ja joni menikanti iki? Jaskara iken ¿Tsoa ixonmein ati iki nato Dios ikonhaismaton, ja jiria Diosen sontárobo jaskáakin? —akin jato aká iki.

²⁷Jaskáara jabaon moa aibata keskáribiakin yoikana iki, Goliat, retekietian ja menitibo.

²⁸Ikaxbi Eliab, ja Davidkan wetsa rekenra, jonibo betan jaskati yoyo ikai ninkatax, jaki sinákin neskáa iki: —¿Jaweaki mia neno joárin?

¿Tsokikayaki ja tsoa jonibi jain jayamainko, ja ichama carnerobo min jenebeirana? Jawe akasi mia neno joarin ixonra en onanke, miara jakonma shinanya iki, mia neno joá riki reteanankanaitian jato oinkasires —akin.

²⁹ Jatianra Davidkan yoia iki: —¿Ja ramabi yoyo ixonki, jawe jakonma en aka? —akin.

³⁰ Jaskati moa jawen wetsaibakeax kaxon, Davidkan wetsa joni yokatabira, jaskáribiakini yoia iki.

³¹ Ja Davidkan yokataitain ninkábaini boxonra jatíribibaon, Saúl yoikana iki. Jatianra Saúlnin David kenamaa iki.

³² David joketianra Saúlnin yoia iki: —Mato Goliatnin jaskábira tsoabi shinan namanti yamake, ea min yonoti kaaxa, jabetan ea reteananti iki —akin.

³³ Saúlninra yoia iki: —Ja Goliat betan reteanani kaira, miabicho katima iki, ikaxbi miara bebon bakeranonhira iki; jara jawen bakeranontianbi reteananaí joni iki —akin.

³⁴ Jatianra Davidkan yoia iki: —Ea min yonoti, nokon papan carnerobo koirannai inontianra, westíora leónman iamaxon westíora oson, kenenko joxon carnero boaitian,

³⁵ japekáobi kaxon, jawen rekinhai-noabi en carnerobo bichinkatitai; en jaskáa ea bikasaitianra, jawen koinbi yatanxon en retenon kaman rishkikatitai.

³⁶ Jaskáxonra, min yonotinin, león betan oso retekatitai. Jaskáribiakindra nato Ibo Dios ikonhaisma filisteo jonibo en jato akai, jiria Diossen sontárobo betan reteanantinin keenkana iketian.

³⁷ Ja león betan oson mentsisainoa ea xabaa Ibonribira, ja Goliatnin mekenmamea ea xabaati iki —akin. Jatianra Saúlnin yoia iki: —Jaskara ikax katanwe, Iborá mibé iki —akin.

³⁸ Saúlninra jawen chopá David sawemati jato yoia iki, bronce maitira maimakana iki, itan bronce xopananti-ribira sawemakana iki.

³⁹ Ja senenainbira Davidkan jawen chopakibi jawen cintora ikain ja espada panina iki, jatíbi jabo jaskátaanra axeama ikax, nii tanata iki. Ikaxbi jainxonbira Saúl neskáakin yoia iki: —Axeama ikaxa, ea neskaraboya niti-koma iki —akin. Jatianra moa jatíbi jopémaa iki,

⁴⁰ jawen bastón bixonra, pichika makan jakonshokobo ja weanmamea katóxon ja boai pishan napota iki, jainoaxa David jawen baladora tsomaya, Goliat nokoi kaa iki.

⁴¹ Jatianribira já David nokoi kaai jainmashaman iikaina iki. Jan akin-naira ja bebon kaa iki.

⁴² Goliatnin David oinnara, bakeranon ikáx jawen yora joxochashaman, itan metsá iká iki, jaskara ikenra jan oinna iresabires iká iki,

⁴³ jaki shirokinra yoia iki: —¿Eaki westíora ochiti iki, jaskara jiwiaxon min ea akí joti? —akin. Jaskátaanra jatianbi jawen diosen janenko, David jakonmakin shinanxona iki.

⁴⁴ Jaskáribaxonbira, Goliatnin yoia iki: —¡Neri jowé, min nami, noyai yoinabo betan pimis yoinabo, já pinon ixon en jato meninon! —akin aká iki.

⁴⁵ Jatianra Davidkan yoia iki: —Ea akira mia joai, espadaya, yami taxo kenshoya, itan tsatsitaxoya ikaxbi eara mia akí kaai Ibo jatíbi atipana Israelnin sontárobaon Diossen janenko, jabo betan reteanankaskin min yoia iketian.

⁴⁶ Ramara Ibon mia eki menikaamake-tian retexon, en mia texteai, jaskáxonra filisteo sontárobaon mawá yorabo, en noyai yoinabo betan pimis yoinabo pinon ixon meniai. Jatianra nato netemeabaon jatíxonbi onankanti iki, Israelbo betanra westíora ikon Dios jake ixon;

⁴⁷ jatíbi ja neno tsinkitabaonra, onanti iki, espadanin, itan yami taxo kenshon-bicho jato Ibon jatoaresyamai. Nato reteanantira Ibona iki, jaskara ixonra non mekenman mato jan menikamai —akin.

⁴⁸ Jaskáara Goliat David nokoi kaai pikota iki, jatianra jaribi ishtonbires jakikirana iki,

⁴⁹ Jainxonra Davidkan pisha meranoa westíora makan bixon, jawen baladoran nanetaanan jawen betonkoainshaman Goliat tsakaa iki. Ja tsakaa jawen betonkoain makan jikiketianra jawen bemananinbi maiki paketa iki.

⁵⁰ Jaskáxonra Davidkan jáaresa iki. Westíora baladorayaxon itan westíora makanmanresa Davidkan Goliat retea iki. Espada boamara iká iki.

⁵¹ Jaskatira ishtoi kaax já patax nia iki, jawen xaka meranoa tsekataan jawen espadaninbi retea iki. Jaskáaxonra textea iki. Jatianra jatíribi filisteo sontárobo, moa jaton reteananti onan joni mawáketian oinnax, jabákana iki.

⁵² Jatianra israelita itan ja Judá sontárobo, saí ikana iki: Jato retenon akanwe iki, jatianra ja Gathain kaai jikitiainko itan Ecrón jema xepotibo ikainko kaman jato chibankana iki. Saaraimhainoax peokootax Gat itan Ecrón jemanko kati bai kamanra, jatíbiain filisteo sontárobaon mawá yorabo tipia iká iki.

⁵³ Ja filisteobo chibani botana pekáo Efes-damimhain banéxon, israelitabaon jaton carpa peotabo ikainoa jatíbi jaton jawéki bikana iki.

⁵⁴ Jatianra Davidkan Goliatnin mapo itan jan reteananti jawékibo bixon jawen xobonko boá iki, japekáo basi-chaara ja mapo Jerusalénhain boá iki.

⁵⁵ Saúlninra moabi jawen sontárobaon koshi Abner, yokata iki, ja Davidkan Goliat akí pikoti kaaitian: —Abner, ¿Nato baken papaki tsoa iki? —akin.

⁵⁶ Abnerninra yoia iki: —Enra mia akonkin yoiai, enra onanyamake —akin. Jatianra Saúlnin yoia iki: —Jaskara ikenra, tsoarin ixon min onanti jake —akin.

⁵⁷ Goliat retea pekáo, jawen mapo moa baneti jokin beaitian oinxonra,

Abnernin David nokoxon Saúl bebon boá iki,

⁵⁸ Janra yokata iki: —Baké, ea yoiwe ¿Tson bakerin mia? —akin. Jatianra Davidkan yoia iki: —Min yonoti ja Belénhain iká Isaínin bake riki ea —akin.

David betan Jonatánman jakon janoxon akonkin shinanna

18¹ David, Saúl betan yoyo iki senena pekáora, David kikini jabetan raenanai Jonatán baneta iki. Jaskákinra janbix noikaata keskári-biakin, noia iki.

² Ja netebira Saúlnin, jatíbitian jan akinti bia iki, jatianra jawen papan xobonko moa raanyamaa iki.

³ Jonatánmanra janbix noikaata keskáakin David noia iká iki, jaskákinra jatíbitian raenanai iti shinanbekona iki.

⁴ Jaskákinra, ja sawea jawen perakooti betan jawen tari jopétaan mania iki, jainxonra jawen espada, jawen kanóti, itan jawen cinturónribi mania iki.

⁵ Jatíbi ja Saúlnin ati yoia jawékibo senenhaxonra, Davidkan jan atipana jawéki jato oinmaa iki, jaskara iketianra Saúlnin jawen sontárobaon koshi jikimaa iki. Jatianra Saúlnin sontárobaon, itan jatíbi sontárobaon keenshaman, ja David iká iki.

Davidki rarokanaitian Saúl jaki notsia

⁶ Sontárobora baneti bekana iki, Davidkan Goliat retea pekáo, Israelhainoa jatíbi jemankonia ainbobora, jaskara jaton axé iketian panderoyaxon itan platilloyaxon raroshamankin bewananbi itan danzaananbi, apo Saúl bii jokonkana iki.

⁷ Ja biira bewaananbi danzani, bewá banebaneshamani ainbobo neskákana iki:

“Waranka jawen rawíra Saúlnin reteke, ikaxbi chonka waranka jawen rawíra Davidkan reteke”, iki ikana iki.

⁸ Jaskaraton tsokásmaara, ikonbiresi sinati Saúl yoyo ika iki: —Ja Davidkan chonka waranka reteara yoikanai, ikaxbi en warankares reteara yoikanai. ¿Ramara nokon toan moa apo imakan-tits maxkáke! —iki.

⁹ Jatianshamanra Saúl, moa Davidki notsii jakonmaata iki.

¹⁰ Saúlnin ebé banéwe akin David aká pekáora, Diossen raana joxon yoshiman shinanman Saúl iboa iki, jaskáara ja apo ikax jain iká xobo meranoaxbi, westíora shinan ramita joni keska iká iki. Ikaxbi jaskaai axea ixonra, Davidkan jawen arpa ten axona iki, jatianra Saúl jawen yami taxo nenké kensho tsomaa iká iki.

¹¹ Ishtonbiresa Saúlnin, yami taxo kensho wakeinabainxon, David chiké-kibi kataxbainki chachiti shinanna iki, ikaxbira Davidkan Saúl, rabéakin winonna iki.

¹² Jatian moa já akinhamakin Ibon, David akinnai oinnax, Saúl jaki raketa iki.

¹³ Jaskákinra pikoxon, westíora tsamá waranka sontárobaon koshi jikimaa iki, jaskatira reteanani kaax itan joáx ikátiai.

¹⁴ Jaskáakin Ibon akinnara, Davidkan akaibo jatíbi jakonbires ikátiai.

¹⁵ Jaskati bebonkaresaitian oinnaxa, Saúl Davidki raketa iki.

¹⁶ Ikaxbira Israelhainxon, David jatí-xonbi noikana iká iki, jankaya ja reteanani katinko, itan moa banétiainko jato ikinnai iketian.

¹⁷ Wetsa netera Saúlnin David yoia iki: —Ninkáwe, enra nokon reken bake ainbo Merab, min awinhanon ixon meniai, ikaxbi en mia yoiai riki, miara nokon reteanankas koshi shinanya iti iki, jaskatira mia Ibon janenkobo reteananti iki —akin. Saúlnin shinannara iká iki, enbira reteti yamake, filisteobora en amati jake ixon.

¹⁸ Ikaxbi Davidkan yoia iki: —Ea apon rayos iti ikaxbira, ea jawemabi iki, nokon rarebo Israelhain ikábora jawemabobi iki —akin.

¹⁹ Jaskáakin yoixonbira Saúlnin aká iki, ja David moa jawen bake Merab meniti nete nokóketian, já meniamakin Meholainoa joni Adrielres menikin.

²⁰ Ikaxbi Saúlnin wetsa ainbo bake Micalra iká iki Davidkan keenai. Jaskáakin Saúl yoikanara, jawen keen-shaman iká iki,

²¹ filisteobaon retenon ixon jan beparankinra awinhanon ixon David meniti shinanna iki. Jaskara shinanxonra, Saúlnin, jawen rabé itin David yoia iki: —Ramakayara ikon, mia nokon rayos ikai —akin.

²² Japekáora Saúlnin jawen yonotibo yoia iki: —Matobicho ixonra, David betan yoyo ikin maton neskáati iki, ikonbiresira apo mion keenai wetsa jawen yonotibo bebonbires, já nokon rayos ikára jakonhira iti iki, ikira ikai, akinra maton ati iki —akin jato aká iki.

²³ Saúlnin yonotibaonra boxon, David jatíbi joibo jaskáakinribi yoikana iki, ikaxbi Davidkan jato yoia iki: —¿Matonki shinanaí apon rayos iti, ea keska jawebioma itan kikinmashoko joni ikax itibires iti iki ixon? —akin.

²⁴ Davidkan jato yoia keskáribira kaxon jawen yonotibaon Saúl yoikana iki.

²⁵ Jatianra Saúl, filisteobo David rete-makasai ixon, jato yoia iki: —Ja David yoikanawe, ja wanoti kopí noa axea keskáakin, ea apo kopíatitiani, ea jan menitinin keenai riki, pacha filisteobaon jakina rebichi, ea nokon rawíbaon kopikaatinin keenai kopí —akin jato aká iki.

²⁶ Jatianra jaiba boxon, ja Saúlnin yonotibaon David jaskáakin yoikana iki, jainxonra moa Davidkan onanshamana iki, eara moa apon rayos iki nokoti kaai ixon. Ja iti nete senenamatiambira,

²⁷ Davidkan jawen jonibo bia iki, jatoya kaxonra rabé pacha filisteo retea iki, japekáora jaton jakinna rebichi, jawen rayos inoxon apo boxona iki. Jatianra Saúlnin jawen bake ainbo Mical, moa awinhanon ixon menia iki.

²⁸ Ikaxbi Saúlra David Ibon akinnaitian itan Micalnin noia oinnax.

²⁹ Jaskara ikenra moa ikátiai bebonbires raketa iki, itan jatíbitian jawen rawí baneta iki.

³⁰ Jainoax wetsa jawékiribi, ja filisteo joni koshibo jaton sontároboya beax israelitabo betan reteananaitiibira, ja Saúlnin wetsa sontárobaon koshibaon akai bebonbires, Davidkan jato keyokaitai, jaskákinra akonbireskin jatixonbi jakonhakanai iká iki.

Saúlnin David jaskáaxon reteti benaa

19¹ Wetsa netera, Saúlnin jawen bake Jonatán itan jatíbi jawen sontárobaon koshibo yoia iki ja David retexonanon ixon. Ikaxbi Jonatánman kikinhakín David noia ixon,

² keshana iki: —Nokon papanra jaskáaxon mia reteti benai. Jaskara iketian bakish yamékirishoko koira-mewe, jaskara iken wetsabaon onana-mainko ja enbicho onanainko jonéwe.

³ Jain mia joneta mainko, mia ochómara ea nokon papa betan kaai. Jainoaxa mia yoií ea jabé yoyo iti iki, jaweki ea yoitiki ixon oinnox, japekáora en mia onanmati iki —akin.

⁴ Jatianra Jonatán, David akinkasi jawen papa betan yoyo ika iki: —Janra jawe jakonmabi akáma iki, jaresa ichabires jakon mia aká iki, jaskara ikenra min yonoti David min retetima iki, itan;

⁵ mawá meranbi onitsapikainxonra Goliat retea iki, jaskáaxonra jatíbi Israel jonibo akonbireskin jato xabáa iki. Minra oinna iki, jatianra mia raroa iki. ¿Jawekopiki, jawe jakonma akáma ikenbi yankabires min David retekasai? —akin.

⁶ Jatianra Jonatánman yoia ninkata Saúl koshin saí ika iki: —Diossen janenkora en yoiái David mawátima —iki.

⁷ Jatianra Saúl jain iikanai mainmeax moa kaa iki, japekáora Jonatánman, David kenaxon jatíbi jaskati jawen papa

betan yoyo ika keshana iki. Jaskaa pekáora Saúlhiba boá iki, jatianra Davidkan moa akataiai keskáribiakín Saúl teexona iki.

⁸ Reteanantira peokooribia iki, jatianra filisteobo betan reteanani jawen sontároboya David kaa iki, jaskáxonra jatoareskana iki, akonbireskin jato akanara jabákana iki.

⁹ David-ra moa apon xobonko iká iki, wetsa netera Saúl, Ibon amaa jakiribi jakonma shinan yoshinman aká iki; jatianra Davidkan arpa akaitian, jawen xobo chiké meran yami taxo kensho tsomáya yakata iká iki,

¹⁰ jainxonra jawen yami taxo kensho David chikéki kataxkin chachikaskin tanaa iki. Ikaxbira ja aká, Davidkan winona iki, jatianra jawen yami taxo kensho chiketen chankata iki. Ja yamébira David jainoax jabati kaa iki.

¹¹ Jatianbira Saúlnin, jawen jonibo yoia iki, Davidkan xobonko kaxon koiranxon wetsa nete xabáketian reteti. Ikaxbira jawen awin Micalnin, David keshankin yoia iki: —Nato yamé jabáyamaxa, bakish mia moa mawá iti iki —akin.

¹² Jatianbira Micalnin ja David, westíora ventananin paninxon pakémaa, jabati kaa iki.

¹³ Japekáora Micalnin westíora jaton ja rabiti bixon, Davidkan oxatiain jikimaa iki, jara cabra boo xewaa mai-maxon chopan mapoa iki.

¹⁴ Jatian ja Saúlnin raana jonibaon yatannoxon xepótiainxon David kenakanatianra, Micalnin jato yoia iki isiniriki, akin.

¹⁵ Ikaxbira jakiribi Saúlnin jawen jonibo David benati raankin, neskara ati jato yoia iki: —¡Jawen oxatiain ikenbira, jainoa maton pikoti iki, jaskáaxonra en retenon ixon maton ea bexonti iki! —akin.

¹⁶ Jatianra ja Saúlnin jonibo ja Davidkan xobonko jikikana iki, ixonbira jawen oxatiain westíora jaton ja rabiti

jawékibicho nokokana iki, cabra boo xewá maia.

¹⁷Jatianra Mical kenamaa joketian Saúl nin yoia iki: —¿Jaweatiki nokon rawí jabámaxon min ea neskáakin parana? —akin. Jatianra Mical nin yoia iki: —En jabámayamaketian, ea retetira yoia iki —akin.

¹⁸Jaskati jabataxa David, Samuel oinni Ramáin kaa iki, jatíbi Saúl nin jaskára aká bora yoia iki. Japekáora David betan Samuel Naiot jeman jaai kaa iki.

¹⁹Jatianra David Naiot Ramáin iketian onanxon Saúl nin,

²⁰yatanxon nexati jawen jonibo raana iki. Ja Saúl nin jonibo nokóxon oinnara, westíora tsamá profetabo rama iti joi bii ikana iki, ja iká iki Samuel nin jato ikinaibo. Jatianbira Diossen shinan Saúl nin jonibo meran jikixon jato iboa iki, jatianra jaboribi rama iti jawéki yoiai iká iki.

²¹Jaskata ninkáxonra Saúl nin, wetsa jonibo raana iki, ikaxbi jabaonribira rama iti jawéki yoikana iki. Jawen kimisha itinra Saúl nin jaweti jonibo raanribia iki, jatianra jabaonribi rama iti jawéki yoikana iki.

²²Jatianra Saúl Ramáin jabi kaax, Secúhain iká jain onpax akanainko nokoxon, jaweranoki Samuel betan David iki ixon jato yokata iki. Jatianra Naiothain riki ixon yoikana iki,

²³jatianra Saúl jain kaa iki. Ikaxbira Diossen shinan já meran jikixon iboa, Saúl nin ribi rama iti jawéki yoia iki, jaskáaxa Naiot Ramáin kaman yoibo kaa iki;

²⁴jaskáribixonbira jawen chopa jopeta iki, jatianra jaskáabi, rama iti jawéki yoi, Samuel bebon ja nete iibaitax itan ja yamé ishinribia iki. Jaskatira ikanai: “¿Saúl ribikayaki, profeta iki?” iki.

Jonatánman David akinna

20¹Naiot Ramáinoax jabati kaaxa, Jonatánhiba David nokota iki, jainxonra yoia iki: —¿Jawe en akárin?

¿Jaweratorin nokon jakonma? ¿Min papaki ea jawen ochaa iketianki akai, ea retenxon benakin? —akin.

²Jatianra Jonatánman yoia iki: —¿Diossa keenyamai! ¿Nokon papanra mia reteyamai! Minra onanti jake, nokon papanra ea yoiamaxonbi jawebi ayamai, ireda jawéki akinbira ea yoiai. ¿Jawekopíki nokon papan mia retekasai ea yoiamakin joneti iki? ¿Jaskarara itima iki! —akin.

³Ikaxbira Davidkan yokáboresa iki: —Min papanra kikinhakín onanke ea min jakonhai, jaskákinra mia keenyamanaketian, min onantinin keentima iki. ¿Ikaxbi miabi itan Ibon janenkora en mia yoiai, eara moa wetsatianbires mawatibi iki! —akin.

⁴Jatianra Jonatánman yokata iki: —¿Mia kopí en jawe atinki mia keenai? —akin.

⁵Jatianra Davidkan yoia iki: —Ninkáwe, bakish iki bená oxen fiesta, jatianra ea apo betan pii yakáti nete iki. Ikaxbira min ea imaresti iki, rama peokootax wetsa bakish yantan kaman ja mainko ea joneta iti,

⁶min papan ea manoaítianra, min yoiti iki, ishtonres nokon jema Belénhain kanoxon en mia yokata, nokon rarebobaon baritiatiibi yoina menikin menokanai iketian, jato betan akí kanoxon.

⁷Jatian jakon riki iki ixon mia yoiketianra, ea jakonbires iti iki; ikaxbi min jaskáa sináketianra, ea jakonmakasi iká riki ixon, min onanti iki.

⁸Jaskara iken ea akinpariwe, ea riki min yonoti, mibé raenani jatíbitian janoxonra, Ibo bebonxon non akonkin shinanbekona iki. Jatian en jakonma akona iketian minbi ea retewe. Ea min papaiba botira mia maxkáyamake —akin.

⁹Ikaxbi Jonatánman yoia iki: —¿Jaskara jawékibo shinanyamawe! Nokon papan mia retekasai ninkáxonra, en mia yoiti iki —akin.

¹⁰ Jatianra Davidkan yokata iki: —¿Tsonki ea yoiti iki, min papa min jaskara yoia sináketian? —akin.

¹¹ Jonatánmanra yoia iki: —Ja tsoa yama xabáshaman ikainko kanonkawé —akin. Jatianra ja xabá ikainko kabé-kona iki,

¹² jainxonra Jonatánman yoia iki: —Israelbaon Ibo Diossen janenkora, akonkin senenhati shinanxon en mia yoiai, bakish nato horaribi iamax wetsa bakish nato horaribira, jawekes-kamein nokon papan shinanai ixon en onanti iki. Jawen iká miki jakon iketian oinxonra, mia yoiti en jato raanti iki,

¹³ ikaxbi nokon papan mia jakonmakasaitian, abánon ea Ibon akonbireskin masá tenemakin, mia yoiamaketian itan jakonax jabáti ikenbi en mia akinyamakietian. ¡Nokon papa akinni keskáribiakín, mia Ibon akinbanon!

¹⁴ Jakon riki, rama ea japariketian, Ibon mia jakonha keskáribiakín, earibi jakonhawe. Jatian ea mawákenbira,

¹⁵ nokon rarebo jatfbitian min jakonhakin jenetima iki. ¡Min rawibo Ibon kikinshakin retekín keyoa pekáobi! —akin.

¹⁶ Jaskáaxonra Jonatánman ja senenhakekonti joi David betan aká iki,

¹⁷ noibamis ixonra Jonatánman, akonkin senehanxon jakiribi yoia iki, itan janbix noikaata keskákinra David noia iki.

¹⁸ Japekáora yoia iki: —Bakisha bená oxen fiesta iki, ikaxbi min yakátian mia yamakietianra, jawekeskatiki yamaa ixon mia rotokanti iki.

¹⁹ Ikaxbi jawen kimisha iti neten mia yamakietianra, bebonbires mia yamaa rotokanti iki. Jaskara ikenra ja moa mia jonéibatainkoribi mia kati iki, kaaxa ja makan tsamábo ikainko mia iti iki.

²⁰ Jatianra, mecha tanakin ja joxo toróain tsakakin ati keskaakin, kimisha pia en jao potati iki,

²¹ jaskáaxonra nokon yonoti en yoiti iki: ‘Piabo benatanwe’, akin. ‘Ja piabora mia

ikainoax neri iki, kaxon jabo bitanwe’, akin, en aketianra, jawebira ea winoyamai ikax, mia jakonbires pikoti iki. Akonkinra, Diossen janenko en mia yoiai.

²² Ikaxbi en yoiti iki: ‘Ja piabora oribires iki’, akin. Jatianra min onanti iki, Ibo mia jabátinin keenai.

²³ Ja non anoxon shinanna jawéki, jatfbitian onanara Ibo iki —akin.

²⁴ Jatianra David ja mainko moa joneta iki, jatian ja oxe benakan fiesta ati moa nokóketianra, apo moa pinox mesanko yakata iki.

²⁵ Jaskati axea ikaxa, chiké patax yakata iki. Jonatánra ja bebon yakata iki, jatian Abner, Saúl patax yakata iki. Ja Davidkan yakátianra jawebi yamaa iki.

²⁶ Ja netera Saúlín jawebi yoiamaa iki, jakonma aká Dios bebon benxoama ikaxa ibirai ixonra shinanna iki.

²⁷ Ikaxbi jawen rabé itin fiesta iti nete xabáketianra, jakiribi Davidkan yakátian jawebi yamaa iki. Jatianra Saúlín, jawen bake Jonatán yokata iki: —¿Jawekopíki bakish itan rama Isaínín bake pii joyamaa? —akin aká iki.

²⁸ Jatian Jonatánman yoia iki: —Davidkanra ea ishton Beléhnain kanoxon yokata iki.

²⁹ En katanwe anon ixonra ea yokata iki, jawen rarebobaonra jaton jemanxon, Dios jawéki menoxonai, jatianra jawen wetsan kati yoia iki. Jaskákinra jawen wetsabo betan fiesta akí kaai ea yoia iki, jatianra en kati yoia iki. Jaskatira neno nobé pii joyamake —akin.

³⁰ Jatianra Saúl ikonbiresi Jonatánki sináxon yoia iki: —¡Jakonma titan baké! ¿Min jisáki en onanyamaa ja Isaínín bake mibé kikini raenanai, jaki minna itan min titana rabinma iki?

³¹ David japariketianra, mia koshi itimabobi iki. ¡Jaskara iken, já benati jato raannxon, ea neno bexonkanwe, jara mawáti jake! —akin.

³² Ikaxbi Jonatánman yoia iki: —¿Jawekopiki já mawáti iki? ¿Jawe akárin? —akin.

³³ Jatianra Saúl nin jawebi yoiamakin, Jonatán chachinoxon jawen yami taxo bia iki, jaskáketicianra jan onanna iki, jawen papan David reteti shinana.

³⁴ Jatianra Jonatán ikonbiresi sinátax, moa mesankoniax wenita iki, jawen rabé iti fiesta netenra moa piamaa iki, jawen papan David jakonmaaketian, akonbireskin jaon masá shinanai kopí.

³⁵ Ja wetsa nete xabata yamékirira, jatian David betan nokoananti yoia ikax, ja jonetainko Jonatán jawen westíora yonoti bakeranon betan ja mainko kaa iki,

³⁶ Jara neskaati yoia iki: —Ishtoi kaxon en pia potaibo benatanwe —akin. Jatianbira ja yonoti ishtoi kaa iki, Jonatánman pia potai kaman, ikaxbi ja yonoti ochóbires paketa iki.

³⁷ Jatian ja pia paketainko moa yonoti nokóketianra, jatíbi jawen koshianixbi, Jonatán saí ika iki: —¡Ja piara mia ikainoax, ochóbires iki! —ikira iká iki.

³⁸ Jainxonra Jonatánman jakiribi jawen yonoti saí aka iki: —¡Tsasiama! ishtoi, ishtontani katanwe! —iki. Ja Jonatánman yonotinira moa pia bia iki, jaskáxonra jawen koshi boxona iki,

³⁹ ikaxbira jan jawebi onanyamaa iki, Jonatán betan Davidkanresa onanna iká iki jawe yoi ikárin ixon.

⁴⁰ Japekáora Jonatánman jawen reteananti jawékibo, jawen yonoti menia iki, jainxonra jakiribi moa jemanko boxonti yoia iki.

⁴¹ Jatian ja yonoti moa kaketicianra, David ja makan tsamá pékáokeax pikota iki, jainoaxa Jonatán bebon kimishai mai tii anon kaman beota iki. Japekáora bekekanax winibekona iki, jatianra ikonbiresi David winia iki.

⁴² Ja senentianbira Jonatánman, David yoia iki: —Jakonbires katanwe, ja non senenhanoxon akonkin rabéxonbi shinanara Ibon janenko iká iki, jainxonra non

yokata iki; jatíbitian já noobetan inon ixon, jainoax min chiní bakebo betan, itan nokon chiní bakebo betan inon ixon —akin. Japekáora moa David kaaitian, Jonatánribi moa jemanko kaa iki.

Saúlhibakeax David jabata

21 ¹ Sacerdote Ahimelec yoyo akira, David Nob jemanko kaa iki; jatian shinanamainbires merax ratékainxonra yoia iki: —¿Jawekeskataxki miabichoshoko jóá, itan tsoabiki mibé joyamaa? —akin.

² Jatianra Davidkan yoia iki: —Aponra ea yoike, westíora jawéki axonti, jatian jara tsonbi onanti yamake jaweati ea raanarin, itan jawe ati yoia ea jóárin ixon. Ja en ikinna jonibora en moa yoia iki jaoranoaxki ea jato betan nokoanantiki ixon.

³ Jatibetin, ¿Ramabiki mia jawe pitia iki? Ea pichika pan iamaxon, jaweki min nokoai ea ja meniwe —akin aká iki.

⁴ Jatianra sacerdotenin yoia iki: —Ea jayata panra wetsabires panma iki, jara Dios ibomaa pan iki. Ikaxbi enra mia meniti atipanke, mia itan mibé iká jonibo ainbobo betan yoranama iketian —akin.

⁵ Jaskáketicianra Davidkan yoia iki: —Jatíbitian reteanani kakinra ainbobi non yoranyamai. Non japacho akai jawéki akíra noa jakon iki, jaskara ikaxa wetsabires jawékima iketian, ramakaya noa bebonbires jakonshaman iki —akin.

⁶ Jatianra wetsa panbo yamaketian, ja Dios ibomaa panbi sacerdoten David menia iki, ja iká iki jawen toan ja rama netebi aká pan xanashaman boxon, ja jainxon yoina menotiankonía bexon yasankana.

Saúl Davidkan reteyamaa

24 ¹ Saúl filisteobo chibani katanax moa banéketianra keshankana iki, David ja En-gadiain iká jain tsoabi jamaa manain iibata.

² Jatianra Israelhainoa kimisha waranka sontaro Saúlnin katota iki, jainoaxa kikinbires shanka ketóainbo David itan jawen jonibo benai bokana iki.

³ Ja boira carnerobaon chitébo ikainko nokokana iki, jabo pataxa iká iki westfóra kini, jain ja David jawen joniboya joneta. Jainra Saúl poi jikia iki,

⁴ jatianra jawen jonibaon David yoia iki: —Ramara moa nokóke mia jaskáaxonti Ibon yoini, ja min rawí miki menikaamatiki. Min oinna jakon iketian jaskara awé —akin. Jatianra Davidkan, weníxon xaxaki iamakin netexon jawen perakooti pakéxkin kextenana iki,

⁵ ikaxbi jaskáa pekáora, jawen shinan meran masá shinanna iki,

⁶ jaskákinra jawen jonibo yoia iki: —¡Jara apo iti Ibon katota iki, jakopira en retekashamai! —akin.

⁷ Jaskáxonra Davidkan jawen jonibaon, Saúl retekanti ikenbi, jato amayamaa iki, jatianra Saúl kini meranoax pikotax moa kaai tekíkaina iki.

⁸ Ikaxbi já pekáobi kini meranoax pikotax David saí ika iki: —¡Nokon apo, nokon apo! —iki. Jaskataitianra Saúlnin pekáori naise iki, jatianra David, Saúl kikin shinanon rabii maibi tii anon kaman beota iki,

⁹ jainxonra yoia iki: —¿Jaweatiki en mia jakonmakasai iki ikanaibo, min jato ikonhai?

¹⁰ Minbira rama onanai, ea rama kininko iken en retenon ixon, mia Ibon eki menikaamakenbi, mia retekashamakin en mia jaweyamaa, enra shinanna iki, Ibonbi katóxon mia apo imaa.

¹¹ Nokon apó, jakonhakin oinwe enki jawe yatana ixon: Ja riki min perakooti pakex, mia reteti ixonbira en mia reteyamake. Jaskara ixonra moa min onanti senen iki, en mia ramianoxon shinannama, mia paraxonbi ramiati shinannama, mikibobi ochaama. Jaskara ikenbira miabiribi ea retenoxon chibani itai.

¹² ¡Abánon noa rabébi ja non akábo, Ibon noa yoixonkin, itan abánon mia ea kopíxonkin! Enra jawetianbi mia ramiati yamake.

¹³ Moabira jonibaon yoia iki: ‘Jakonmara, jakonma joniboibakeax joai’, iki ixon. Jakopíra jawetianbi en mia jakonmati yamake.

¹⁴ Jainoaxibi ¿Tsoa chibaniki mia já pekao joa Israelbaon apó? ¿Ja retekaskin min chibanaiki tsoa iki? Eara iresabires joni iki. Ea retekaskin chibantira, ¡Westfóra ochiti mawá keska, itan westfóra iki keska iki!

¹⁵ Jaskara iken abánon, Ibon shinanon, ja non rabéxon aká jawékibo noa yoixonkin; ¡Abánon en akábo jan oinkin, itan abánon min ea akainbi ea amayamakin! —akin.

¹⁶ Jatian moa David yoyo iki senenketianra, Saúl saí ika iki: —¡Ikaxbi mia jaskati yoyo ikara, mia nokon bake rayos Davidkon iki! —iki. Jaskátaanra winia iki,

¹⁷ jainxonra yoia iki: —Ikonra min yoike, ichabires en mia ramiakenbira, minbiribi ea jakonharesa iki.

¹⁸ Ramara min ea oinmake, akonkin min ea jakonhai; moa Ibon ea miki menikaamakenbira min ea reteyamaa iki.

¹⁹ Ikon riki tsoa joninbira, jawen rawí nokoxon jaweyamakin jakonbires raanhisma iki. Jaskara iketian ¡Abánon min ea rama jakonha kopí, mia Ibon jakonman kopíakin!

²⁰ Ramara en moa pontéshaman onanke, miara apo iki kaai ixon, itan jaskati koshi jikixonra, wetsa Israel jonibo min jato ikinna bebonkanti iki.

²¹ Akonkin shinanon, Ibon janenko ea yoiwe, nokon chiní bakebo jato keyokin retetima, itan nokon rareboyabira mia eon shinanbenotima iki —akin.

²² Jatianra Davidkan akonkin shinanon, Saúl yoia iki, japekáora Saúl moa jawen xobonko kaa iki, jatianra David

jawen jonibo betan jain koiranmetax ikana kininko moa bokana iki.

25¹ Samuel mawáketianra, jatíbi israelitabo winii tsinkíkana iki. Jara miinkana iki Ramáin, jawen xobo ikain. Japekáora David, jain jawebi xoxoyamai Parán mananman kaa iki.

**Jatíríbi israelitabo betan
reteananaitian filisteobo
Davidkan akinna**

28 [Samuel mawata pekáora, David, jawen sokota pacha joni, itan jawen awinboyabi jawen bakebo, Israelhainoax jabatax filisteobaon main jakana iki. Jainra chonka sokota oxe ikana iki.]

¹Wetsa netera filisteobaon, Israelbo betan reteanannoxon jaton sontá- robo tsinkia iki, jatianra apo Aquísnin David yoia iki: —Minra moa kikin- hakin onanke, mia itan min jonibora ebé reteanantiain kati iki —akin.

²Jaskáketianra Davidkan yoia iki: —Kikin jakon riki. Ramara min onan- nai, nato min yonotininki atipana ixon —akin. Jatianra Aquísnin David yoia iki: —Ea retakanaketian jatíbitian eabi- ribi koiranai iti sontárorora en mia imai —akin.

**Saúl betan ja shinanmanres
onanmis Endorhainoa ainbo iká**

³Samuel mawánontianra, jatíbi Israelainoabo winikana iki, itan jape- káora ja pikoniain jawen jemanbiribi Ramáin miinkana iki. Jatianra Saúl- nin shinanmanres onanmisbo, itan ja mawábaon akinnon ixon yokataibo, ja mainmea jato potaa iká iki.

⁴Jatianra filisteo sontárobo tsinki- baini boxon, Sunemhain jain iti carpabo peotaakana iki, jatianra Saúl- ninbiribi jatíbi Israelbo tsinkixon, Gilboa mananman jato ikinna iki.

⁵Ikaxbi filisteobaon carpa peotabo oinnaxa Saúl raketa iki, jatianra moa raké shinanman jaaresa iki.

⁶Jaskara ikenra onannoxon Ibo yokákin tanaa iki, ikaxbira Ibon jawebi yoiamaa iki, namá meranbi, Urim makamanbi, profetabaonbi, jawebi yoiamaa iki.

⁷Jakopíra jawen sontárobaon koshibo yoia iki: —Benakanwe westíora ainbo, ja mawánibaon akinnon ixon yokataibo, jaiba kaxon en onanoxon yokánon —akin. Jatianra jawen sontárobaon yoia iki: —Endorhainra westíora ainbo jake, ja mawánibaon akinnon ixon yokatai —akin.

⁸Jatianra Saúl- nin onankanaketian, wetsa chopá sawea iki, jaskáax yamébi ja ainbo oinni kaitianra; rabé jonin chibana iki. Jawen xobon nokoxonra Saúl- nin ja ainbo yoia iki: —En mia yokatai riki, mawataton kaya min ea kenaxontin en ja ati ea yoinon ixon, enra mia yoiti iki ja jonin kaya min ea kenaxonti —akin.

⁹Jatianra ainbaon yoia iki: —Minra onanke, ja Saúl- nin aká jawéki, ja shinan- manres onanmisbo betan ja mawánibaon akinnon ixon yokataibo ja mainmea jato potaa. ¿Jaweatiki en mia akinketian, ea retekanon ixon ea min jaskaai? —akin.

¹⁰Ikaxbi Saúl- ninra Ibon janenko yoia iki: —Akonkin shinanxonra Ibon janenko en mia yoiai, nato kopira jawe jakonmabi mia winótima iki —akin.

¹¹Jatianra ainbaon yoia iki: —¿En tsoa joti kenaxontinki mia keenai? —akin. Jatianra Saúl- nin yoia iki: —Ea Samuel kenaxonwe —akin. Jatianra ja ainbaon kenaa iki.

¹²Ja shinanamainbi Samuel oinnaxa, ainbo westíorai koshin saí ika iki; jape- káora Saúl yoia iki: —¿Jaweatiki ea min parana? ¡Miara Saúl iki! —akin.

¹³Ikaxbira Saúl- nin yoia iki: —Raké- yamawe ¿Jaweki min oinna? —akin. Jatianra ainbaon yoia iki: —Westíora dios mainmeax keyataira en oinke —akin.

¹⁴Jatianra Saúl- nin yokata iki: —¿Jawekeska jisárin? —akin. Jatian

ainbaon neskaa iki: —Westíora joni yosi perakooti saweyara ike —akin. Jatianbira Saúl¹nin, Samuel riki ixon onanna iki, jaskatira mainbi bekepinon kaman beota iki.

¹⁵ Jatianra Samuelnin yoia iki: —¿Jaweati ea teareskin, min ea jomaarin? —akin. Jatianra Saúl¹nin yoia iki: —Ea riki, kikinbiresi onitsaa filisteobo nobé reteanani bekanaitian, itan ea moa Diossen jenea kopí. Profeta meranxonbira ea yoiamai itan namá meranbi. Ja kopí riki en mia kenaa, ja en atibo min ea yoinon ixon —akin.

¹⁶ Jatianra Samuelnin yoia iki: —¿Jaweatiki ea min yokatai, moa Ibon jenea jawen rawí banéxonbi?

¹⁷ Ja en moa mia yoikatitaira, moa Ibon mibé aká iki. Ja mia apo pikotaa-nanra, ja mibé iká David apo imaa iki,

¹⁸ ja amalecitabo keyoti Ibon yoiaibi mia yoitimaa iketian, itan min senen-hayamaa iketian.

¹⁹ Jaskáribaxonbira Ibon, israelita sontá-robo itan mia filisteoboki menikaamati iki, jaskáara filisteobaon reteanankin jatoareskanti iki, jainoax bakisha mia itan min bakebo mawatax moa ebé iti iki. Jainxonribira Ibon amaa filisteobaon israelitabaon peotabo biti iki —akinra aka iki.

²⁰ Jatianbira Saúl ishtonbires paketax nenkekaini rakata iki. Samuelnin joi ninkáxon, itan westíora nete itan westíora yaméribi jawebi piama ixonbo-bira maxkaa iki.

²¹ Ja ainbaonra Saúl, jawen shinan tsokas iketian oinxon pataxon yoia iki: —Ninkáwe. Ea min yonoti ainbaonra, ja min yokata jawéki moa mia axonke. Nokon jati nete onsá meebainxonra, min yoiabo en mia axonke.

²² Jaskara iketian, rama en mia yokatai riki, ea min ninkáxonti: Ichama pitira en mia pimakasai, jakiribi mia koshinon ixon, itan jakiribi baneti min peotain mia katánon ixon —akin.

²³ Jabira Saúl pikáshama iki, ikax-bira jawen sontárobaon koshibo betan

ja ainbaon teaboxon, ja senenainbi moa jeen imakana iki. Jatianbi wentitaxa oxatiai¹n yakata iki.

²⁴ Jaskatai kamanra ja ainbaon jawen xobomea, westíora waka bene xoashaman retea iki, axonra harina meinxon, levadu-raomabi bata pan aká iki.

²⁵ Japekáora, pikánon ixon Saúl betan jawen sontárobaon koshibo jato boxona iki, jabora moa pikín senenhaa pekáo, itan moa jato kaai abaini ja yamébi jatón peotain bokana iki.

Saúl reteanantiainoax jawen bakeboya mawata

(1 Cr. 10.1-13)

31 ¹ Filisteo sontárobaonra, israeli-tabo reteanankin jato peoa iki, ja israelitabora jato bebonmeax jabákana iki, Gilboa mananmanxon icha-bires jato retékanketianra jabákana iki.

² Jainoaxa filisteobo, Saúl jawen bakeboya kaaitian chibani bokana iki, Jonatán, Abinadab itan Malquisúara retékana iki.

³ Japekáora jatikaxbi, Saúl akí bokana iki; jatian ja kanó¹tinin pia potaibaon potaa kaxonra Saúl tsakaa iki, jainoaxa jatoki moa ikonbiresi raketa iki.

⁴ Jaskákinra jan reteananti jawékinin akinnai yoia iki: —Min espada tsekaxon, ea jan bebánkin chachiwe, ja ikon Dioson onanma jonibo beyama-kanon ixon, ea reteaxa jabo eki shiroi rarokanti iki —akin. Ikaxbira ja akinai-tonin, ikonbiresi rakékin akáshamaa iki. Jatianra jawen espada bitaanon, Saúl janbix jaki paketa iki.

⁵ Jatianra ja akinaitonin oinna moa Saúl, mawá iketian, járibi jawen espadakibi paketax, jabébi mawata iki.

⁶ Jaskatata Saúl, jawen kimisha bake, jan akinnai joni itan jatíbi ja jabáyamaabo jawen jonibo ja nete mawákana iki,

⁷ jatian ja mai teshanpa bekeiba jaa israelitabaon itan ja bari pikotaiori iká Jordánhorikeabaonra, onankana iki; ja Israel sontárobo jabataitian, jatianra

Saúl jawen bakeboyabi moa retetan-
ketian, jaboribi jaton jemabo potabaini
moa jabákana iki. Jatianra filisteobo
jain nokotax, jainbi jaai banékana iki.

⁸Ja wetsa nete xabáketianra filisteo
sontárobaon, mawá yorabo potai boxon,
Gilboa mananman jawen kimisha bake-
yabi Saúl mawá rakata merakana iki.

⁹Jatianra jawen mapo textekana
iki, itan jawen reteananti jawékibora
bichinkana iki, jaskáxonra joi boaibo
jatíbiain filisteobaon main ja joibo
botankanon ixon jato raankana iki,
itan jaton diosbo rabiti xobonko iká-
baon onannon ixon

¹⁰Japekáora Saúlnin reteananti jawé-
kibo, jaton diossa Astarté rabiti xobo

meran akana iki, itan jaton yorara Bet-
sán jema chikekan paninkana iki.

¹¹Jatian Galaadhain iká, Jabes
ikainoa jonibaonra, filisteobaon Saúl,
itan jawen bakebaon yora chiketen
paninkana moa onankana iká iki,

¹²jatíbi koshi shinanya Jabes jonibora
tsinkikana iki, itan ja yamébira taenbi
boboshinkana iki, japekáora Saúlnin
yora itan jawen bakebaona Bet-sán
chiketemea moa bikana iki, jainxon
moa Jabessain banéxonra, ja yorabo
menokana iki.

¹³Japekáora, Jabessain westíora
jiwi naman ja xaobo miinkana iki.
Jaskarabo aká pekáora, kanchis nete
senen ayunankana iki.